

本

山山

糸岡

目

重訂本草綱目序

古之學者始格物物有形有質有氣味紛然犁然不
格無以致吾知也形有特有叢有蔓有歧有苞有莢
質有草木金石鳥獸鱗介氣有升降補瀉寒熱味有
甘苦辛酸神農品嘗之明哲旣以爲本草後賢乃分
南北道地原本山川辨其厚薄清濁之異以推致所
知蘇恭蘇頌諸賢以逮繆氏汪氏各盡其精神心思
益擴所見吾以爲大觀本草之外必推瀕湖爲集大
成廡居金陵嘗脩合藥裏贈貧乏及鄉僻乏醫之區

又持方書俵散以盡吾心近以侍養老親益留心方
術病坊刻瀕湖本草之因仍訛誤爰重爲鏤板經文
集解之舛午者據依古書檢覈善本植物圖大半本
之吳君申甫所段植物圖考藥之產於茅蔣者亦採
擇仿寫餘悉宗原本而精撫焉經始於癸未八月迄
乙酉五月閱二歲糜工數萬乃克蒞事其校理訛誤
監督剗劂命兒子席珍士瑜士珩分任之商推方劑
區別品彙醫士王君鏡堂之力爲多參以鍾君受白
而經紀其事始終不懈者則范君靜存也此外如田

君撰異曹君晴峯熊君仲山翁君鐵梅党君幼雲張君貫之程君達三陳君振遠許君功甫朱君藻臣或參校讐或司綜核或職圖繪謹備書之傳曰人之欲善誰不如我此之謂歟雖然因方以檢藥可也謂所載方果足治病不可也夫病有外感六淫內因七情疑似之差毫釐千里旣失古人處劑之意又以害民而議古書是在善讀者變化神明庶不失吾重訂之本意也已

光緒十一年六月合肥張紹棠自記於冶山竹居

合刻本草綱目拾遺序

世傳靈樞素問爲黃帝岐伯相與問答之書而神農氏嘗百草別其性味以療民疾苦爲本草經其詳不可得知要之皆有聖人之微言非後世所能僞爲也古之帝王生有神靈之德其治天下之具自政刑禮樂文章制度之外至於民之疾痛疴癢亦必引爲一身体戚而其盡物性以利民生必至此而後備也神農本經所列金石草木之可以爲藥者爲上中下三品三百六十五種至陶隱居增爲別錄亦三百六十

五種唐宋以來代有增益明李氏時珍博綜諸家著
爲綱目蓋綦備矣而近人錢塘趙氏學敏又爲之拾
遺以補李氏之所未備然以予所見深山窮谷里嫗
巷嫂謠俗相傳有極其瑰瑣而甦起沈痼乃與參朮
同功者然則天之生物以利民用殆非書之所能盡
也戚友合肥張君又堂旣刻善化鮑氏驗方新編今
年夏復刻李氏綱目趙氏拾遺二書將訖功屬予序
發其意又堂始壯歲時提偏師鏖戰海上當其兩陣
相接殺人如麻未嘗毫髮以動其心及其功成而退

綸巾野服徜徉里閭則若惟恐人之不遂其生者廣
求活人之書刻而傳之其用心不亦善哉且夫天之
愛人至矣陰陽寒暑之偏喜怒哀樂之感不能使民
之無生疾而常恃有物以治之蓋有一疾卽有一藥
也有一疾卽有一藥則必得是藥乃可瘳是疾也今
之爲技術者知希重糈而已其於神農黃帝之書未
必能盡讀也讀之未必能盡通也金石草木之類陳
於前而莫能舉其名況其味與性乎況其於疾之當
與否乎則其殺人也與白刃何以異天下之大猶之

一人之身也大變則大材生焉小變則小材生焉其
變百出而不窮其材固百用而不竭也草木金石之
於治疾未嘗見其有時而不給也治之以其所與私
餌之以其所爲熹以巫爲師惟鬼之祈豕苓桔梗紛
來乘時而三年之艾或終身無以致之嘻其爲操術
也危矣又堂雖不與其事其能無惄然爲之思乎瑞
安孫衣言

張刊本草綱目自序

本草一書撰自軒皇種別三十六分爲三品與內經素問諸書並爲世寶梁陶通明增藥一倍隨品附入唐宋重脩各有增附此歷季之舊本也其編葺爲綱目者自明萬歷初年楚黃李東璧集諸家爲大成一刊於金陵胡氏一刊於豫章藩司白金石草木禽獸蟲魚器物菜果以及人身膚髮垢膩通列一十六部爲綱六十類爲目使溫涼燥溼補瀉宜忌無微不錄誠爲濟世要編較諸爾雅蟲魚之筆嵇含草木之狀

功用不啻霄壤惜乎兵燹屢經藩司藏板遂成灰燼
王弇州所稱如入金谷園種色奪日登龍君宮寶藏
悉陳對冰壺玉鑑毛髮可指數者竟歸咸陽一炬寧
無惋悼余奉命撫江見城郭丘墟瘡痍滿目惻然
念之夫金湯不固失在榮衛元元未起患在腹心闔
闔未甯病在肢體余甫下車卽築城繕隍建營置衛
清業還民爲根本重計蓋疆域旣先文獻亦不敢稍
後故整白鹿祀典而置生徒之贍田閱誌乘簡編而
理版籍之殘缺求綱目一書僅存其名矣爰稽江右

藩臬二司所藏舊鏤書百有餘種俱闕經世大業今
盡化爲烏有又時值歲祲湖東西尤切軫念媿乏勾
漏之砂安能盡人力以補天工卽今庾嶺虔州疫癘
洊臻余署隣玉隆仙井又安能借旌陽一匕水以蘇
此一方民乎海內青囊肘後不少概見醫不識方藥
不諳性任意妄投猶方鑿而圓柄是綱目之鉉梓更
有不容後于諸經籍者公餘簡原本而特加訂正壽
之梨棗次第行之使藥石有備而災眚無虞庶幾不
至緩其所急也夫金匱石室補忘拾遺匪異人任倘

獲以是書進之講筵以備 睿覽使君臣佐使之用
藉鹽梅之鼎以調五味皆和三法互效養元氣于周
身付大還于庶眾以充先聖王立言之妙而闡明東
璧氏一片苦心於天下後世使醫俗者卽以醫國壽
國者卽以壽民奚翅多識鳥獸草木之名與三百篇
並傳哉

順治丁酉長至日撫江使者三韓張朝璘題

張刊本草綱目黎序

昔人有言曰宰相端理陰陽此何謂也此謂人之所
患乎陰陽者不少矣而宰相之所以應體元之心
而下盡調元之術者亦不多矣九洛之事蓋無一非
王事也乃前而期之至於五行卻而期之至于福極
惟五行不能皆順而無違故斯人不能皆福而無極
而一遇疾病天札之數有難盡諉諸自然則吉凶同
患之者又思所以救之醫是已醫之法昉于黃帝而
醫之具實詳於神農是總在三皇如春之世伏羲畫

卦以明陰陽之後聖人之制作卽未有或加于本草者可見其周物之智莫精而前民之用莫博焉也自神農本草爲經則李當之陶弘景蘇恭孟詵唐慎微諸家爲傳而最後乃有萬厯年間蘄州李時珍所著本草綱目蓋庶幾乎集成焉於是江西刻之而海內傳之且名之江西本草而特貴重之垂五十年矣不意其爲烏有也豈醫藥亦在雜燒哉大中丞溫如張公來撫茲土正當凋殘之餘獨盛起廢之業故以制器尚象而稽之于日用飲食之外則有如大壯之宮

室也豫之重門也渙之舟楫也隨之馬啖之弓矢之
書契而乾坤之衣裳也莫不取也夫何所取諸取諸
其無病我人而已矣酉之歲晚天災流行鬼崇越嶺
循章貢水而下民以大駮公爲之致精誠勤禱祀祈
免得免矣而又有所進求度公之意豈不曰祝由者
醫之一端而非其全乎從祝則以人而接天從醫則
以人而代天從本草則用人而正所以用天是故十
三卦之物無得而肖之而六十四卦三百六十日之
物舉得而品之此神農氏所以爲尚亦不可謂作綱

目者之非其功臣也公購得初本別本並付諸專家
精其讐校爰授梓人既告究矣而後乃屬小子寬爲
辭寬何辭哉第憶寬他日文戰不利時頗肄業于此
而未窺其奧也學治病而不能則謂身非調元之人
耳及歷禍亂膺疾痛索治病者而不得則又日望世
有調元之人而疑其時之未至耳今公誠其人也公
爲此書誠其時也似公之所以幸寬也而公獨幸寬
已哉蓋嘗試論之十年反覆之治其道無不出于死
人公今日和平之治其道無不出于生人道出于死

人則近死不救亦有不仁者之無爲道出於生人則
之死致生亦有仁者之學問故醫者黃炎二帝共之
黃有醫法而不耑醫功其言可以爲治未可以爲仁
炎無醫名而謹醫具其言可以爲仁復可以爲治公
之所爲先本草而後靈素也厥旨甚深而 今天子
御極十有五年矣召祥止殺無不用之信乎其能脩
體元之職也其 襄公也亦以爲無芻狗我萬民則
茲書未有不上之輶軒而入之 睿覽者而公之所
以幸天下又豈其微哉且天下將不以爲李氏之書

而直以爲公之書矣公好是書也夫亦若已有之焉
以此而知變理陰陽必非驕吝之宰相所得與而百
官本草雖不盡蠲忿合歡亦宜有以衷其熱寒和其
畏惡也南昌黎元寬題

張刊本草綱目李序

易有之天地之大德曰生聖人之大寶曰位然天地無心而成化顯仁藏用鼓萬物而不與聖人同憂聖人有心而無爲必裁成輔相曰左右斯民而後得與天地同功若是者何也生民有欲耳目口鼻動于內聲色臭味引于外欲若不成則必有人道之患欲若成則必有陰陽之患卽欲不識不知以順帝之則無如其爲顛爲蹶大惑易性故聖人劑之以藥餌而使得終其天年憂之也深思之也切慮之也長其聰明

睿知既足以照人之肝膽腎腸而見垣一方其沈潛高朗又足以沁物之骨髓精營而深入其朕所謂通神明而類萬物範圍曲成以盡參贊之能事莫如醫之一法在昔伏羲氏仰觀俯察近取遠求肖物畫卦此卽伏羲氏之藥矣而古史稱伏羲之后爲女媧氏鍊五色石以補天斷鼇足以立四極聚蘆灰以濟滔水是天地可醫亦猶女媧氏之藥也至于神農制頰鞭鞭草木而嘗之蓋嘗一日遇七十二毒不憚其勞若軒轅乃作內經素問靈樞令其臣佐岐伯雷公鬼

史區輩更相詰難審脈察俞定爲鍼灸是古帝皆能
醫法而本草特其醫具本草三卷書尚矣歷漢晉唐
宋之諸以醫名家若兼于仙學葛洪陶弘景孫思邈
之流莫不有綴緝增上蓋於醫道深卽于仙道近矣
然未有蘄陽李時珍後起之全臚列而別爲綱目者
綱目是朱子所以記今古法春秋者也書昉其意兼
總而條貫之物從其區事追其朔故足述焉睿歸自
維揚幽憂之病發于素無病之人亟欲得本草而讀
之治有名醫蕭濟川者來言撫臺司馬溫如張老先

生業有鑄矣古之人乎于此言已睿時粗畢爲人子
之事未得聞衛生之經急取原本視之無有越二日
友人黎左巖以本草來其論本草與靈素稍稍異似
有微詞而予乃欲合而言之何也本草如六官靈素
卽其馭官者矣本草如六經靈素卽其傳經者矣本
草如五兵靈素卽其將兵者矣聖人之道一也太極
動而生陽靜而生陰陰陽和會疾病不生以陽入陰
以陰入陽藥不諳其性情草木固能致災良工取之
拙者疑殆此予所以專其責于用本草者乎然非獨

黃之能用炎而炎之能用義也帝曰猶病王曰如傷
其道亦莫不由此朱震亨三代而下之醫也其與門
人論太極則嘗取陰陽造化之精微與醫相出入者
明之又曰是以道相告非徒醫也蓋言術而異同者
有矣言道而豈有異同者乎且先生昨年于虔南之
疫用巫也而未用醫先生以爲今之醫恐無異于今
之巫耳巫在牀下呼呵鬼神紛如醫入閭閻投湯劑
亦紛如天下事之病于紛如者有幾古之上醫惟用
一物氣純而功速今之人以情度病如獵兔廣野處

處置蹄多其物以幸其功天下人之多其物以幸功者又有幾本草之方右單而左複先生將著焉以起民病抑以立世教已雖然君臣之用則不可得而廢也以聖人在位必有君而有臣其治病亦爾爾此卽大道之精微性命之上理赤張滿稽曰天下均治之爲願而何計以有虞氏爲有虞氏之藥瘍也禿而施鬚者也病而求醫孝子以脩慈父其色焦然聖人羞之先生所由以是書而預之公之也蓋語理而不盡于六經語治而不盡于六官語兵而不盡于陰符也

是燮理陰陽之大經濟合仁壽鄙夭之區而盡調劑
之豈獨吾江右哉余嘉先生有相之道而大得古帝
王之用心乃不揣固陋樂而爲之敘論云爾

順治十五年孟夏穀旦通議大夫資治尹禮部左侍
郎管禮部尚書事兼內翰林弘文院學士通家治弟
李明睿拜撰

張刊本草綱目熊序

大中丞張公撫江政成威德覃敷近悅遠來民安吏
肅上旣屢錫溫綸嘉賚隆等晉級考慎甌枚有日
矣不佞文舉臥疴山中請事疏闊忽拜函書以新鐫
本草綱目屬序伏讀書詞引誼諳惻拳拳於江省兵
燹餘黎重以水旱頻仍民生之元氣日耗且寒暑不
調陰陽失序疾病薦臻欲求所以全生濟世之法而
苦不可得因見本草綱目一書取類該博辨物精詳
名實罔淆儲用各別慨然於昔人所謂可以保身可

以全生可以養親可以濟世之義遂捐貲劓劓以廣
播傳爰命不佞序言闡繹文舉沈疴未豁正急求枚
生七發以蘇委頓捧誦公書而不禁潏然汗下也稽
舊說本草經三卷爲神農所作而不經見漢書藝文
志亦無錄焉惟樓護傳稱護少誦醫經本草方術數
十萬言本草之名蓋見於此而帝王世紀則又云黃
帝使岐伯嘗味草木定本草經造醫方以療眾疾乃
知本草之名又自黃帝始總之上古聖人具生知之
智故能辨天下品物之性味合世人疾病之所宜而

後世賢知之士代不乏人從而和之考其同異增其
品目擇其去取鉛翰昭章定羣言之得失丹青綺煥
備庶物之形容是心也固帝王天地萬物一體之心
而道卽天下萬世所必共由而無敝之道也不則動
植形生因方舛性春秋節變感氣殊功離其本土則
質同而效異乖於采摘則物是而人非名實旣乖寒
温多謬昔人云以此施之凡庶其欺已甚況君父乎
大中丞公撫江兩載無一念而不痛惜瘡痍無一事
而不訪咨民瘼蠲逋有疏帶徵有疏災荒有疏致特

創營房以還民居請罷燒磁以寬工力廣造差船以
甦商命招徠反側以靖亂源觀風錄遺以弘文教槩
舉數端而公憫憫皇皇何日而不願登西江十三
於仁壽之域宜其覽是書而躍然脗合遂立新剞劂
廣布流傳卽無論岐黃養生家讀之可以探精微而
參謬誤諸凡仁人君子讀之具曉從前帝王師相仙
佛名流無非充此一腔活人之心察物理之攸歸窮
診候之妙術務使草木咸得其性鬼神無所遁情是
書行而蒼生大庇黔首蒙休恩邁裁成功俾造化百

姓日用而不知噢咻是賴大中丞公之所以嘉惠江
右德被羣黎豈曰是蒐遺書而完逸集已哉不佞聞
之學書則紙費學醫則人費今天下不學而仕其費
人也更甚於醫公鑄此以戒庸醫不明於方術而誤
人抑或於吏治民生深有感也不然此嗷嗷湯火者
迫於催科惴於萑苻而不安其生豈獨一陰陽之患
能戕民命也考綱目本草爲明蓬溪令蘄州李時珍
撰李君蒐羅百氏訪采四方分爲五十二卷列爲一
十六部部各分類類凡六十標名爲綱列事爲目增

藥三百七十四種方一千一百六十往江西藩司藏
有精板不佞猶及見之今以兵火煨燼久矣幸公重
梓神采煥發頓還舊觀文舉遂不敢以疾不文辭慨
述其所以摭古而法今傳後者如此而於公煌煌之
命終愧未能稱塞也時

順治十有五年歲在戊戌端月上元前進士出身通
議大夫吏部左侍郎前本部右侍郎通政使司右通
政吏部郎中典選事南州治生熊文舉頓首拜撰

張刊本草綱目李序

蓋余流覽載籍至方技所傳如內經靈樞金匱玉函
與夫桐君雷公之所著記皆散逸漫漶獨三皇以來
本草一書昭垂千百世歷秦火不劫未嘗不深歎古
先聖人博物明理爲生民立命仁治之心蓋不朽云
書昉於黃農以五行主運以三品析藥而按周天三
百六十五度以定數後之君子益以圖象詳其義類
旁證于經史百家綱舉目張而其道爲大備然刻之
而行則自余江右始也爰罹兵燹板付燼灰毋論江

鄉之人以不得存是書爲憾天下人欲得是書而食其利者惴惴慮其湮沒與內經諸書等而我大中丞溫如張公則取而精其校讐付之梓以傳嗟乎此其心何心哉蓋亦所爲博物明理仁治生民亦猶行古之道也歟神農之言曰上醫養命中醫養性夫義軒而後以至今日民生之不安其性命之常者亦多故矣起視江右地瘠而民勞兵戈之餘荆棘叢生加以水火盜賊之莫測征科用緩之弗調稔眚旱潦之洊臻而沓至皆足以召盞干和而爲民病虛中弛局邪

陰蘊伏剔則精銷殆乃滋孽蓋吸吸焉而公之治我
江右也旣兩年于茲矣凡黎庶之疾苦皆引爲切身
之痾瘵豈不曰惟茲江土 聖天子重以簡書畀之
附循而且褒功晉爵有加亦惟是數十百萬生靈實
託命焉故有一不從民生起見者不以治心有一不
爲民生襲祉者不以治政於是爲蠲恤爲擊釐爲寬
貸爲營建銷兵氛於日月通文運於風雷雨暘弗若
不難捐賑以補造化之憾災疫流行不難禱祀以奪
鬼神之權故事可專制罔餘遺力機非在我則連章

累牘委曲肫懇與殘子爭此旦夕之命必得請而後
已民習嘉義物無害生時無逆數舉一切奏議告檄
可以成一代治書以報 宸極以詔來茲而必取此
方技之紀聞而亟亟焉行之此其心何心哉亦惟曰
民生之不安其性命之常也蓋多故矣政可旁通法
無古過陰陽寒暑難必者天而且耳目飲食以益其
毒淫而且哀樂喜怒以戕其液絡而且思慮營爲以
傷其神謀金石草木可以生天下者卽可以殺天下
彼先古聖人所爲一日而嘗七十毒甚則解肌結筋

揲荒爪募必於死法中而致之生其心可師其法具
在倘不急爲流傳設民不幸而爲二豎所侵六賊所
虐乃卒然委之庸醫不可託之區其能成三折而效
一匕者誰哉此公所爲亟亟刊是書以行意也書旣
成又依然江右刻之而行也江右之復有是書者必
將歸其功於公曰此我中丞張公之賜也天下之再
見是書者必將歸其功於公曰此江右中丞張公之
賜也公當不自居而上其功于 君必曰臣不佞受
茲簡畀以事拊循將以仰承 聖天子加惠元元之

休命而推廣行之其何敢專承其賜則茲刻也於以
治心於以治政於以忠君父而利濟羣生公之明德
遠矣雖然論醫于上古則立象而意盡論醫于末世
則泥器而法窮故神而明之存乎其人抑嘗讀物理
論曰夫醫者非仁愛不敢託也非聰明理達不可任
也非廉潔淳良不可信也知此則任人行政道甯外
是周禮醫之官有五隸于天官冢宰厥旨微哉言舉
斯心加諸于彼其于古先聖人仁治之道不於公而
見其大端乎故屬余爲序而余序之若此

順治戊戌孟夏治通家眷弟吉州李元鼎頓首拜撰

吳訂本草綱目自序

大凡書不足以集大成其編纂不足以備體用則綱目勿稱焉載籍極博猶爲考信是也曩東璧李先生荆楚博雅君子也成本草綱目一書人第知先生綜核羣籍文成億萬分十六部五十二卷不知以彼其才歲歷三十霜書采八百餘家稿三易然後告成事焉其閒圖象繪形芟復補闕繩譌解惑仍其舊而新是圖如舊本千五百一十有八種而外所增三百七十有四蓋李氏之新書也亦旣勤且詳進乎大道矣

然未敢自信請王弇州先生爲玄晏往余寓目而游
心焉先生之書觀止于發凡與遺表中獨是輯成治
法見其炮製一準乎雷公且有用苗用根用子與葉
之別申言寒熱溫涼之性升降浮沈之理味有五曰
甘曰鹹曰酸曰苦曰辛治有三曰汗曰吐曰下以越
宣通瀉補輕重滑瀉燥溼之十劑復權衡大小緩急
奇偶複之閒明晰大毒小毒無毒畏惡相反之忌至
於分引經絡列諸驗方衷夫藥性易不云乎本乎天
者親上本乎地者親下亦各從其類也矧清陽之氣

出上竅濁陰之氣行下竅清陽發腠理濁陰走五臟亦大彰明較著者也豈第物產從地名從主人便參稽觀覽云爾哉斯又先生之精微焉者也是孝子之事親與國手之活人鏡觀此書許世子栽杏叟之事吾知免矣然本草非先生昉也始於炎黃旣於岐高盛於漢衍於梁浸淫於唐宋曰綱曰目至先生而大備比于史事紫陽温公分路揚鑣何多讓焉先生是書自昔仁廟閒一刻再刻其圖似是而非者有焉其文烏焉魯魚者有焉余與友人黼明錢子恂圖刻

身言本真編目 月
之未工商讐較之獨脊踵事增華爲重訂梓宇內久
推第一善本今年春黼明子倦於事且謂余歸里以
來無所事事盡授余行世余惟宇內同人咸知余與
黼明子於先生之書相與以有成也今復研訂一過
不惜洛陽紙賈夫庸知作者之與行世者不功相半
乎

順治乙未春日澹甯子玉函吳毓昌謹書

吳訂本草綱目吳序

吾家仲玉函氏天質淳茂通博多聞蚤脩公車之業
藉甚藝林其尊人小泉公世傳禁方爲時倉扁過庭
指授盡得其祕奧遂以鼎鉉燮龢之手寓之乎刀圭
一日而名動京師官中翰爲簪筆侍從之臣三事大
僚咸虛左引重若吾師閣學烏程溫公祿勳海昌葛
公最莫逆交相與參味玄旨談討芝桂無閒旬月於
余及家中允若谷則以棣萼壘篋之好周旋邸舍猶
庭階也而都人士之求眡者踵至立效玉函固恂

恂德言君子豈僅以方技鳴哉無何旋返初服干旄而式廬者無異長安貴游時而術彌精道譽彌廣懸壺市中奔走宇內人人指太和堂爲耆域天矣而周仁溥濟之思政未有涯也新得鏤版本草綱目不忍祕諸帳中重加研訂櫺印善本流通以廣其傳夫本草昉自炎黃歷代諸家裒錄箋注寢以繁夥不無紕謬未有若楚中李時珍所輯之博瞻而精核者舊本一千五百餘種爲之刪蔓拾遺又益三百七十四種釐爲十有六部鉅綱細目犁然不紊嘗奏進之以獻

覽下禮曹惜頒行未暨仍閱靈蘭之藏而已昔抱朴
撰玉函方九十三卷自謂單行徑易籬壁之間顧盼
皆藥眾急之病無不畢備今是書重訂凡若干卷而
玉函之易簡行意猶夫昔之玉函也夫五味五氣五
色品類變化之繁九竅九藏九候疾疹湊理之異疑
似在杪忽閒誤用之將杜漏蘭作綿州附子善用之
則胡麻鹿藿堪療頭痛之疴麥麴芎藭暫止河魚之
疾神明在心得意忘象聞文殊令善財採藥善財徧
觀大地無不是藥者拈一莖草度與文殊殊示眾曰

此藥能殺人亦能活人夫大地無不是藥而所拈才
一莖爾人知藥能活人不知能殺人知能殺能活不
知活之爲殺殺之爲活了是義者然後可以活人于
無量世有流水長者子諮祕法于大醫父善知四大
增損徧至國內號于眾曰我是醫師遇諸病苦輒言
慰諭聞者歡喜病卽除差夫輒言慰眾歡喜愈病此
不載方書從何指授抑豈顛顛藥物見效者則醫之
爲意可知已玉函紹聞厥考弘傳妙緒藉手是書一
以爲龜鑑一以爲筌弔隨所方便而度脫之活人無

算稱曰流水前身不誣矣小泉公有子哉
順治歲在乙未孟陬月武林西谿種梅道者八十二
遺叟吳本泰題

吳訂本草綱目吳序

頽鄙老生旣病且懶負此二患世莫能醫其對案不食憑牀不寐則病之爲也醫書堆於前而莫能擇調攝之法經於耳而不肯深味則懶之爲也家玉函氏通才懿行而良於醫今之越人也謂予子弢可解也請卽以子之懶治子之病懶於搜覽亦將懶於心思空乎其無所迎也浩浩其無所留也庶亦有瘳熟識周身者而後可洞一臟察諸症之源委者而後可審一病精於方藥之大全者而後可治一方明於天文

地利物理山川草木土石金鐵微細嵬瑣分別變化之情性者而後可用一藥故使以醫視醫書倦則思棄莫若等之爲靈異博物稗官逸史神仙遊戲之說可興可觀可駭可樂引之使詳析之使辨媿媿而不疲不厭則子之懶將自治懶治而所苦當自知可一刀圭起也予謝曰然哉本草綱目行世已久然醫家亦閒有束之不觀者況餘人乎玉函氏特求善本精較而梓行之將以嘉惠後來豈僅李君之益友亦不愧神農之功臣矣予重有惜者本草綱目人雖不盡

知然亦多拱璧奉之肆其考訂而通其意者若通鑑
綱目儒家者流人置一冊何遵紫陽之教者無其人
也良可悲夫

順治乙未春日吳太沖拜書

錢刻本草綱目小引

是書參契微玄輯蒐今昔著方治之效不罣纖茫詳
產殖之繇兼徵諧異斯誠弘濟之寶筏久視之真詮
也業已廷獻天子推重名公皎若日星奚煩詞贅第
殺青雖久殊深積蠹之嗟對白無人空抱出蛇之想
縱匪陶書誤註難辭燕說多疑茲刻重加讐較務極
窮研糾舛訂訛波畫毋容粗畧拾遺補闕疑似必攷
源流兼之圖繪盡神雕鏤入巧繙勘易多人之手庀
鳩經八月而成版楮方新流傳斯廣將瀕湖半生苦

心更藉是編不朽而是編重開生面庶借斯刻俱長
不揣吾愚聊記其畧云爾崇禎庚辰仲春之朔古臨
錢蔚起鏡石父書於六有堂

夏刻本草綱目自序

夫醫之爲道君子用之以衛生而推之以濟世故稱
仁術乃後世以藝視之縉紳先生多所弗講賈子不
云乎古之聖人不居朝廷必居醫卜之間醫可以賤
簡爲哉本草者固醫家之耨鋤弓矢也洪纖動植最
爲煩雜散于山澤而根于臟腑名不覈則誤取性不
明則誤施經不辨則誤入誤者在幾微之間而人之
死生壽夭係焉可無慎乎余夙爲痰暈作楚近復滋
甚時檢軒岐家言以自衛得楚名醫李時珍氏所輯

本草綱目輒側弁其閒大抵與蘇頌圖經唐慎微證類相表裏而采摭名實引據徵驗不啻倍之所增藥三百七十餘種皆近世所習用而確乎有明效者其用心亦勤矣醫家者流得此書而存之庶幾可無誤乎閒以質之藩臬諸大夫俱云甚善而頗訝其字畫之漫漶者多也圖更鏤之於是搜積貯之所奇者悉付剞劂氏而諸大夫亦以多寡佐其不足蓋六閱月而工竣旣成帙復肆覽焉較前倍覺爽目余因是而有感於天之生物何其獨厚於人也旣有百穀以養

其生又有百草以治其疾夫使蚩蚩者有生而無疾也則滋以百穀足矣惟其不免於寒暑陰陽之侵也故必良藥補之毒藥攻之而後得以祛其所害而終其天年則天心見矣嗚呼此治道也治生者去其所以害吾生者而已矣治民者亦豈有他術哉去其所以害吾民者而已矣今天下號稱治平無事然而病在脈理者已數形見四民之業窘而重以熯澇之不時所在有啼號聲則元氣索采權之使十道四出而鴟張虎視者且徧埏寓則邪氣盛當其時欲如醫者

按其表裏標本而治之何者宜補何者宜攻其用以
補者將爲蕩朮乎抑芟與文無乎用以攻者將爲黃
芒乎抑堇與烏喙乎取其散於山澤者以調吾臟腑
必何如而後可以無誤是必有精於其理者若跗之
滌和之視長桑君之方太倉公之診而後能挽斯世
於仁壽耳余則安能敬因是書之成而以商之醫國
者癸卯孟秋之朔巡撫江西都察院右副都御史古
汭郡夏良心撰

夏刻本草綱目張序

余自辛丑承乏江臬臬署務簡多暇日則取署中舊刻繙閱之庶幾乎運甓之思焉一日謁中丞桐汭夏公云本草綱目一書大有裨于生人非特多識資也而初刻未工行之不廣盍圖廣其傳乎余受而觀之乃楚名醫李時珍所輯蓋嘗經御覽而備上方者也夫本草之名尚已古聖人愛民深憂民切故羲皇有八卦之畫炎帝爲百草之嘗畫卦以示趨吉避凶嘗草以使繕生救死蓋自有易以後卽有此書誠謂民

行民生均重于世而當務爲急故萬政未遑而藐焉
一草一木之是求也不然豈不知自暇自逸而肯一
日之閒遇毒七十甘以區區腑臟嘗試于剛柔升伏
百千萬變之中哉何收弗暇農求未出萬言雖諷于
君卿三卷弗登于冊府漢末存者三百六十餘種耳
陶蘇李韓諸賢相繼增益唐慎微于圖經外旁摭遠
引而再益其品蓋至千五百餘種蔚乎富矣然品類
旣煩名稱或雜宋人表章尤多僭者李君憂之爲是
芟復補遺又益三百七十四種分爲十有六部總據

正名附釋別號而次之集解辨疑以正誤詳其生產
肖類氣味以明實附以主治諸方以著用命之曰本
草綱目蓋集諸家之大成哉或者謂人惟五藏病止
七情古之聖儒處齊不過數種而何取紛紛之爲愚
則謂藥者醫用也良醫之用藥也簡而其儲藥也備
故芫華一撮半夏數丸已足取效而搜其囊則牛溲
馬勃鼠肝蟲臂無不有也何也儲與用異也此書之
作固儲道也天之愛人甚矣人之生齒日煩物之化
育亦盛人之情識日廣病之變態亦多物之生也若

有待人之用也若有期則取之惡得不博平者不可
爲毒溫者不可爲寒辛者不可爲苦而平毒溫寒辛
苦之中微者不可爲甚重者不可爲輕也一物而根
株異宜一形而補泄殊性而至于名與實淆如荀書
之誤讀呂覽之誤註蹲鴟誤稱苦彌誤索者不可勝
數也則辨之又惡得不詳乎故物雖有名用實未著
若藤菝蛄蟹不錄可也其它草根樹皮跂行喙息以
至七苴芻狗之類秉命雖微效用則大既有明驗可
厭其多哉況漆葉青麩曾益樊阿之壽柔湯火齊竝

愈齊臣之疾昔之名者今已非今之實者可終棄耶
嘗讀東陽記有虎丸療心疾之徵叔微書有獺爪治
肺蟲之目道元述解毒之草名曰牧靡邵公著救饑
之糧稱爲石穀諸如此類吾猶恨其弗該而惡可以
米鹽槩之哉故得其精者可以保身可以全生可以
養親可以濟世庶幾神農氏之風乎而達者觀之則
可以窮萬物之蹟可以識造化之妙而見天地之心
則多識固其餘矣中丞公撫江右四年于茲嘗節冗
食衍緩置義倉一區貯穀二萬有奇爲賑恤計買田

二百于城東儲鏹三千于郡帑爲似續計旣錙銖嗇
它費矣而獨有所用于此蓋倉廩足則民不以非歲
死醫藥具則民不以非死疾死此其于民生豈有二
哉昔人集古方書意亦如此是役也中丞公倡之在
事諸寅長佐之南新二縣尹成之不佞思董剗剔之
事而已刻始于今歲正月竣于六月旣竣喜而爲之
序萬厯癸卯孟秋朔日江西按察司按察使長洲張
鼎思頓首書

本草綱目原序

紀稱望龍光知古劍覘寶氣辯明珠故萍實商羊非
天明莫洞厥後博物稱華辯字稱康析寶玉稱倚頓
亦僅僅晨星耳楚蘄陽李君東璧一日過予弇山園
謁予留飲數日子窺其人晬然貌也癯然身也津津
然譚議也真北斗以南一人解其裝無長物有本草
綱目數十卷謂予曰時珍荆楚鄙人也幼多羸疾質
成鈍椎長耽典籍若啖蔗飴遂漁獵羣書搜羅百氏
凡乎史經傳聲韻農圃醫卜星相樂府諸家稍有得

處輒著數言古有本草一書自炎皇及漢梁唐宋下
迨國朝註解羣氏舊矣第其中舛謬差譌遺漏不可
枚數迺敢奮編摩之志僭纂述之權歲歷三十稔書
攷八百餘家稿凡三易複者芟之闕者緝之譌者繩
之舊本一千五百一十八種今增藥三百七十四種
分爲一十六部著成五十二卷雖非集成亦粗大備
僭名曰本草綱目願乞一言以託不朽予開卷細玩
每藥標正名爲綱附釋名爲目正始也次以集解辯
疑正誤詳其土產形狀也次以氣味主治附方著其

體用也上自墳典下及傳奇凡有相關靡不備采如
入金谷之園種色奪目如登龍君之宮寶藏悉陳如
對冰壺玉鑑毛髮可指數也博而不繁詳而有要綜
核究竟直窺淵海茲豈僅以醫書觀哉實性理之精
微格物之通典帝王之祕籙臣民之重寶也李君用
心嘉惠何勤哉噫砥玉莫剖朱紫相傾弊也久矣故
辯專車之骨必埃魯儒博支機之石必訪賣卜予方
著弇州卮言恚博古如丹鉛卮言後乏人也何幸觀
茲集哉茲集也藏之深山石室無當盍鑿之以共天

下後世味太玄如子雲者時萬厯歲庚寅春上元日
弇州山人鳳洲王世貞拜撰

進本草綱目疏

湖廣黃州府儒學增廣生員李建元謹□□□

奏爲遵奉□□□□□□□□□□□□□□□□

明例訪書進獻本草以備采擇事臣伏讀禮部儀制

司勘合一款恭請□□□□□□□□□□□□□□

聖明勅儒臣開書局纂脩正史移文中外凡名家著

述有關□□□□□□□□□□□□□□□□□□

國家典章及紀君臣事跡他如天文樂律醫術方技

諸書但成一家名言可以垂于方來者卽訪求

解送以備采入藝文志加已刻行者卽刷印一

部送部或其家自欲進獻者聽奉此臣故父李

時珍原任楚府奉祠奉□□□□□□□□□□

勅進封文林郎四川蓬溪知縣生平篤學刻意纂脩

會著本草一部甫及刻成忽值數盡撰有遺表

令臣代獻臣切思之父有遺命而子不遵何以

承先志父有遺書而子不獻何以應□□□□□

朝命矧今脩史之時又值取書之會臣不揣譎陋不

避斧鉞謹述故父遺表臣父時珍幼多羸疾長

成鈍椎耽嗜典籍若啖蔗飴攷古證今奮發編
摩苦志辨疑訂誤留心纂述諸書伏念本草一
書關係頗重註解羣氏謬誤亦多行年三十力
肆校讐厯歲七旬功始成就野人炙背食芹尙
欲獻之□□□□□□□□□□□□□□□□□□□□
天子微臣探珠聚玉敢不上之□□□□□□□□□□
明君昔炎皇辯百穀嘗百草而分別氣味之良毒軒
轅師岐伯遵伯高而剖析經絡之本標遂有神
農本草三卷藝文錄爲醫家一經及漢末而李

當之始加校脩至梁末而陶弘景益以註釋古藥三百六十五種以應重卦唐高宗命司空李勣重脩長史蘇恭表請伏定增藥一百一十四種宋太祖命醫官劉翰詳校宋仁宗再詔補註增藥一百種召醫唐慎微合爲證類脩補眾本草五百種自是人皆指爲全書醫則目爲奧典夷考其閒玼瑕不少有當析而混者如葳蕤女萎二物而併入一條有當併而析者如南星虎掌一物而分爲二種生薑薯蕷菜也而列草品

檳榔龍眼果也而列木部八穀生民之天也不
能明辨其種類三菘日用之蔬也罔克的別其
名稱黑豆赤菘大小同條消石芒消水火混注
以蘭花爲蘭草卷丹爲百合此寇氏衍義之舛
謬謂黃精卽鉤吻旋花卽山薑乃陶氏別錄之
差譌酸漿苦膽草菜重出掌氏之不審天花栝
樓兩處圖形蘇氏之欠明五倍子構蟲窠也而
認爲木實大蘋草田字草也而指爲浮萍似茲
之類不可枚陳畧摘一二以見錯誤若不類分

品列何以印定羣疑臣不揣猥愚僭肆刪述重

伏者芟之遺缺者補之如磨刀水潦水桑柴火

艾火鎖陽山柰土茯苓番木鱉金枯樟腦蠍虎

狗蠅白蠟水蛇狗寶秋蟲之類竝今方所用而

古本則無三七地羅九仙子蜘蛛香豬腰子勾

金皮之類皆方物土苴而稗官不載今增新藥

凡三百七十四種類析舊本分爲一十六部雖

非集成實亦粗備有數名或散見各部總標正

名爲綱餘各附釋爲目正始也次以集解辨疑

正誤詳其出產形狀也次以氣味主治附方著其體用也上自墳典下至傳奇凡有相關靡不收采雖命醫書實該物理我□□□□□□□□□□

太祖高皇帝首設醫院重設醫學沛仁心仁術于九

有之中□□□□□□□□□□□□□□□□□□□□□□

世宗肅皇帝既刻醫方選要又刻衛生易簡藹仁政

仁聲于率土之遠伏願□□□□□□□□□□□□□□

皇帝陛下體道守成遵祖繼志當離明之正位司考

文之大權留情民瘼再脩司命之書□□□□□□□□□□

特詔良臣著成□□□□□□□□□□□□□□□□

昭代之典治身以治天下書當與日月爭光壽國以

壽萬民臣不與草木同朽臣不勝冀望屏營之

至臣建元爲此一得之愚上干□□□□□□□□□□

九重之覽或准行禮部轉發史館采擇或行醫院重

脩父子啣□□□□□□□□□□□□□□□□

恩存歿均戴臣無任瞻□□□□□□□□□□□□□□

天仰□□□□□□□□□□□□□□□□□□□□

聖之至

萬曆二十四年十一月 日進呈十八日奉口
聖旨書留覽禮部知道欽此

本草綱目凡例

一神農本草三卷三百六十種分上中下三品梁
陶弘景增藥一倍隨品附入唐宋重脩各有增
附或併或退品目雖存舊額淆混義意俱失今
通列一十六部爲綱六十類爲目各以類從三
品書名俱註各藥之下一覽可知免尋索也
一舊本玉石水土混同諸蟲鱗介不別或蟲入木
部或木入草部今各列爲部首以水火次之以
土水火爲萬物之先土爲萬物母也次之以金

石從土也次之以草穀菜果木從微至巨也次之以服器從草木也次之以蟲鱗介禽獸終之以人從賤至貴也

一藥有數名今古不同但標正名爲綱餘皆附於釋名之下正始也仍註各本草名目紀原也

一唐宋增入藥品或一物再出三出或二物三物混註今俱攷正分別歸併但標其綱而附列其目如標龍爲綱而齒角骨腦胎涎皆列爲目標

梁爲綱而赤黃梁米皆列爲目之類

一諸品首以釋名正名也次以集解解其出產形
狀采取也次以辨疑正誤辨其可疑正其謬誤
也次以脩制謹炮炙也次以氣味明性也次以
主治錄功也次以發明疏義也次以附方著用
也或欲去方是有體無用矣

舊本附方二千九百三十五今增八

千一百六十一

一唐宋以朱墨圈蓋分別古今經久訛謬今既板
刻但直書諸家本草名目于藥名主治之下便
覽也

一諸家本草重複者刪去疑誤者辨正采其精粹
各以人名書于諸款之下不沒其實且是非有
歸也

一諸物有相類而無功用宜參攷者或有功用而
人卒未識者俱附錄之無可附者附于各部之
末蓋有隱于古而顯于今者如莎根卽香附子
陶氏不識而今則盛行辟虺雷昔人罕言而今
充方物之類雖冷僻不可遺也

一唐宋本所無金元我明諸醫所用者增入三十

九種時珍續補三百七十四種雖曰醫家藥品
其攷釋性理實吾儒格物之學可裨爾雅詩疏
之缺

一舊本序例重繁今止取神農爲正而旁采別錄
諸家附于下益以張李諸家用藥之例

一古本百病主治藥畧而不切王氏集要祝氏證
治亦約而不純今分病原列之以便施用雖繁
不紊也

一神農舊目及宋本總目附于例後存古也

本草綱目總目

第一卷

序例上

第二卷

序例下

第三卷

百病主治藥上

第四卷

百病主治藥下

第五卷

水部二類

水一

天水類一十三種

水二

地水類三十種

第六卷

火部一類

火一

凡一十一種

第七卷

土部一類

土一

凡六十一種

第八卷

金石部五類

金石一

金類二十八種

石二

玉類一十四種

第九卷

石三

石類上三十二種

第十卷

石四

石類下四十種

第十一卷

石五

鹵石類二十種
附錄二十七種

第十二卷

草部一十一類

草一

山草類上三十一種

第十三卷

草二

山草類下三十九種

第十四卷

草三

芳草類五十六種

第十五卷

草四

陸草類上五十三種

第十六卷

草五

陸草類下七十三種

第十七卷

草六上下

毒草類四十七種

第十八卷

草七上下

蔓草類七十三種
附錄一十九種

第十九卷

草八

水草類二十二種

第二十卷

草九

石草類一十九種

第二十一卷

草十

苔類一十六種

草十一

雜草類九種
有名未用一百五十三種

第二十二卷

穀部四類

穀一

麻麥稻類一十二種

第二十三卷

稷粟類一十八種

穀二

第二十四卷

菽豆類一十四種

穀三

第二十五卷

造釀類二十九種

穀四

第二十六卷

菜部五類

菜一

葷辛類三十二種

第二十七卷

菜二

柔滑類四十一種

第二十八卷

菜三

鹹菜類一十一種

菜四

水菜類六種

菜五

芝栴類一十五種

第二十九卷

果部六類

果一

五果類一十一種

第三十卷

果二

山果類三十四種

第三十一卷

果三

夷果類三十一種

第三十二卷

果四

味類一十三種

第三十三卷

果五

麻類九種

果六

水果類六種
附錄二十三種

第三十四卷

木部六類

木一

香木類三十五種

第三十五卷

木二

喬木類五十二種

第三十六卷

木三

灌木類五十種又一

第三十七卷

木四

寓木類一十二種

木五

苞木類四種

木六

雜木類七種
附錄十九種

第三十八卷

服器部二類

服器一

服帛類二十五種

服器二

器物類五十四種

第三十九卷

蟲部四類

蟲一

卵生類上二十三種

第四十卷

蟲二

卵生類下二十二種

第四十一卷

蟲三

化生類三十一種

第四十二卷

蟲四

溼生類二十三種
附錄七種

第四十三卷

鱗部四類

鱗一

龍類九種

鱗二

蛇類一十七種

第四十四卷

鱗三

魚類三十一種

鱗四

無鱗魚類二十八種
附錄九種

第四十五卷

介部二類

介一

龜鼈類一十七種

第四十六卷

介二

蚌蛤類二十九種

第四十七卷

禽部四類

禽一

水禽類二十三種

第四十八卷

禽二

原禽類二十二種

第四十九卷

禽三

林禽類一十七種

禽四

山禽類一十三種
附錄一種

第五十卷

獸部四類

獸一

畜類二十八種

第五十一卷

獸二

獸類三十八種

獸三

鼠類一十二種

獸四

寓類怪類共八種

第五十二卷

人部一類

人一

凡三十五種
又附二種

計一十六部六十二類一千八百八十種

原書五十二卷埵藥品總目一卷圖三卷奇經

八脈考瀕湖脈學各一卷蔡氏萬方鍼線八卷

又新埵趙氏本草綱目拾遺十卷併前都七十

六卷

本草綱目總目卷首終

本草綱目序例目錄第一卷上

歷代諸家本草

引據古今醫家書目

引據古今經史百家書目

采集諸家本草藥品總數

神農本經名例

陶氏別錄合藥分劑法則

采藥六氣歲物

七方

十劑

氣味陰陽

五味宜忌

五味偏勝

標本陰陽

升降浮沈

四時用藥例

五運六淫用藥式

五臟六腑用藥氣味補瀉

五臟五味補瀉

臟腑虛實標本用藥式

引經報使

本草綱目序例第一卷上

蕪陽李時珍東璧甫編輯

合肥張紹棠又堂重校

序例上

歷代諸家本草

神農本草經

掌禹錫曰舊說本草經三卷神農所作而不經見漢書藝文志亦無錄焉

漢平帝紀云元始五年舉天下通方術本草者所在輶傳遣詣京師樓護傳稱護少誦醫經本草方術數十萬言本草之名蓋見于此唐李世勣等以梁七錄載神農本草三卷推以為始又疑所載

郡縣有後漢地名似張機華陀輩所為皆不然也
 淮南子云神農嘗百草滋味一日而七十毒由是
 醫方興焉蓋上世未著文字師學相傳謂之本草
 兩漢以來名醫益眾張華輩始因古學附以新說
 通為編述本草繇是見于經錄寇宗奭曰漢書雖
 言本草不能斷自何代而作淮南子雖言神農嘗
 百草以和藥亦無本草之名惟帝王世紀云黃帝
 使岐伯嘗味草木定本草經造醫方以療眾疾乃
 知本草之名自黃帝始蓋上古聖賢具生知之智
 故能辨天下品物性味合世人疾病所宜後世賢
 智之士從而和之又增其品焉韓保昇曰藥有玉
 石草木鳥獸蟲魚而云本草者為諸藥中草類最
 多也

名醫別錄

李時珍曰神農本草藥分三品計三百六十五種以應周天之數梁陶宏景復

增漢魏以下名醫所用藥三百六十五種謂之名醫別錄凡七卷首敘藥性之源論病名之診次分

玉石一品草一品木一品果菜一品米食一品有名未用三品以朱書神農墨書別錄進上梁武帝宏景字通明宋末為諸王侍讀歸隱句曲山號華陽隱居武帝每咨訪之年八十五卒諡貞白先生其書頗有裨補亦多謬誤宏景自序曰隱居先生在乎茅山之上以吐納餘暇游意方技覽本草藥性以為盡聖人之心故撰而論之舊稱神農本經子以為信然昔神農氏之王天下也畫八卦以通鬼神之情造耕種以省殺生之弊宣藥療疾以拯夭傷之命此三道者歷眾聖而滋彰文王孔子象繇辭幽贊人天后稷伊尹播厥百穀惠被羣生岐黃彭扁振揚輔導恩流含氣歲踰三千民到于今賴之但軒轅已前文字未傳藥性所主當以識識相因不爾何繇得聞至于桐雷乃著在編簡此書應與素問同類但後人多更脩飭之爾秦皇所焚醫方卜術不預故猶得全錄而遭漢獻遷徙晉懷奔迸文籍焚糜十不遺一今之所存有此三卷其所出郡縣乃後漢時制疑仲景元化等所記又

有桐君采藥錄說其花葉形色藥對四卷論其佐使相須魏晉以來吳普李當之等更復損益或五百九十五或四百四十一或三百一十九或三百混糅冷熱舛錯草石不分蟲獸無辨且所主治互有得失醫家不能備見則智識有淺深今輒苞綜諸經研括煩省以神農本草經三品合三百六十五為主又進名醫別品亦三百六十五合七百三十種精粗皆取無復遺落分別科條區畛物類兼注詔時用土地所出及仙經道術所須并此序合為七卷雖未足追踵前良蓋亦一家撰製吾去世之後可貽諸知音爾

桐君采藥錄

時珍曰桐君黃帝時臣也書凡二卷紀其花葉形色今已不傳後人又有

四時采藥太常采藥時月等書

雷公藥對

禹錫曰北齊徐之才撰以眾藥名品君臣性毒相反及所主疾病分類記之凡

二卷時珍曰陶氏前已有此書吳氏本草所引雷公是也蓋黃帝時雷公所著之才增飾之爾之才丹陽人博識善醫歷仕北齊諸帝得寵仕終尚書左僕射年八十卒贈司徒封西陽郡王諡文明北史有傳

李氏藥錄

保昇曰魏李當之華陀弟子脩神農本草三卷而世少行時珍曰其書散見吳

氏陶氏本草中頗有發明

吳氏本草

保昇曰魏吳普廣陵人華陀弟子凡一卷時珍曰其書分記神農黃帝岐伯桐

君雷公扁鵲華陀李氏所說性味甚詳今亦失傳

雷公炮炙論

時珍曰劉宋時雷斅所著非黃帝時雷公也自稱內究守國安正公或是

官名也胡洽居士重加定述藥凡三百種為上中下三卷其性味炮炙熬煑脩事之法多古奧文亦

古質別是一家多本于乾甯晏先生其首序論述
物理亦甚幽玄錄載于後乾甯先生名晏封著制
伏草石論六卷
蓋丹石家書也

唐本草

時珍曰唐高宗命司空英國公李勣等脩
陶隱居所註神農本草經增為七卷世謂

之英公唐本草頗有增益顯慶中右監門長史蘇
恭重加訂註表請脩定帝復命太尉趙國公長孫

無忌等二十二二人與恭詳定增藥一百一十四種
分為玉石草木人獸禽蟲魚果米穀菜有名未用

十一部凡二十卷目錄一卷別為藥圖二十五卷
圖經七卷共五十三卷世謂之唐新本草蘇恭所

釋雖明亦多駁誤禮部郎中孔志約序曰天地之
大德曰生運陰陽以播物含靈之所保曰命資亨

育以盡年蟄穴棲巢感物之情蓋寡範金揉木逐
欲之道方滋而五味或爽時味甘辛之節六氣斯

成賜胃之管風溼候隙搆手足之災機纏膚腠莫
診易愆寒燠之宜中外交侵形神分戰飲食伺豐

知救止漸固膏肓期於天折暨炎暉紀物識藥石
之功雲瑞名官窮診候之術草木咸得其性鬼神
無所遁情劊麝割犀驅洩邪惡飛丹煉石引納清
和大庇蒼生普濟黔首功侔造化恩邁裁成日用
不知于今是賴岐和彭緩騰絕軌於前李華張吳
振英聲於後昔秦政煨燔茲經不預永嘉喪亂斯
道尚存梁陶宏景雅好攝生研精藥術以爲本草
經者神農之所作不刊之書也惜其年代寢遠簡
編殘蠹與桐雷眾記頗或踏駁興言撰緝勒成一
家亦以珮琢經方潤色醫業然而時鍾鼎峙聞見
闕於殊方事非僉議詮釋拘於獨學至如重建平
之防己棄槐里之半夏秋採榆仁冬收雲實謬梁
米之黃白混荆子之牡蔓異繫縷於雞腸合由跋
於鳶尾防葵狼毒妄曰同根鉤吻黃精引爲連類
鉛錫莫辨橙柚不分凡此比例蓋亦多矣自時厥
後以迄于今雖方技分鑣名醫繼軌更相祖述罕
能釐正乃復採杜衡于及已求忍冬于絡石捨陟
釐而取蒟藤退飛廉而用馬薊承疑行妄曾无有

覺疾瘵多殆良深慨嘆既而朝議郎行右監門府
長史騎都尉臣蘇恭摭陶氏之乖違辨俗用之紕
紊遂表請脩定深副聖懷乃詔太尉揚州都督監
脩國史上柱國趙國公臣無忌大中大夫行尙藥
奉御臣許孝崇等二十二人與蘇恭詳撰竊以動
植形生因方舛性春秋節變感氣殊功離其本土
則質同而效異乖于採摘乃物是而時非名實既
爽寒温多謬用之凡庶其欺已甚施之君父逆莫
大焉於是上稟神規下詢眾議普頒天下營求藥
物羽毛鱗介无遠不臻根莖花實有名咸萃遂乃
詳採祕要博綜方術本經雖缺有驗必書別錄雖
存无稽必正考其同異擇其去取鉛翰昭章定羣
言之得失丹青綺煥備庶物之形容撰本草并圖
經目錄等凡成五十四卷庶以網羅今古開滌耳
目盡醫方之妙極拯生靈之性命
傳萬祀而无昧懸百工而不朽

藥總訣

禹錫曰梁陶隱居撰凡二卷論藥品五味
寒熱之性主療疾病及采蓄時月之法一

本題曰藥象口
訣不著撰人名

藥性本草

禹錫曰藥性論凡四卷不著撰人名氏分藥品之性味君臣佐使主病之效一

本云陶隱居撰然其藥性之功有與本草相戾者疑非隱居書也時珍曰藥性論即藥性本草乃唐

甄權所著也權扶溝人仕隋為祕書正字唐太宗時年百二十歲帝幸其第訪以藥性因上此書授

朝散大夫其書論主治亦詳又著脈經明堂人形圖各一卷詳見唐史

千金食治

時珍曰唐孫思邈撰千金備急方三十卷采摭素問扁鵲華陀徐之才等所論

補養諸說及本草關于食用者分米穀果菜鳥獸蟲魚為食治附之亦頗明悉思邈隱于太白山隋

唐徵拜皆不就年百餘歲卒所著有千金翼方枕中素書攝生真錄福祿論三教論老子莊子注

食療本草

禹錫曰唐同州刺史孟詵撰張鼎又補其不足者八十九種并舊為二百二十

七條凡三卷時珍曰詵梁人也武后時舉進士累遷鳳閣舍人出為台州司馬轉同州刺史睿宗召用固辭卒年九十因周禮食醫之義著此書多有增益又撰必效方十卷補養方三卷唐史有傳

本草拾遺

禹錫曰唐開元中三原縣尉陳藏器撰以神農本經雖有陶蘇補集之說然遺

沈尙多故別為序例一卷拾遺六卷解紛三卷總曰本草拾遺時珍曰藏器四明人其所著述博極

羣書精覈物類訂繩謬誤搜羅幽隱自本草以來一人而已膚謫之士不察其該詳惟誦其僻怪宋

人亦多刪削豈知天地品物無窮古今隱顯亦異用舍有時名稱或變豈可以一隅之見而遽譏多

聞哉如辟虺雷海馬胡豆之類皆隱于昔而用于今仰天皮燈花敗扇之類皆萬家所用者若非此

書收載何從稽攷此本草之書所以不厭詳悉也

海藥本草

禹錫曰南海藥譜二卷不著撰人名氏雜記南方藥物所產郡縣及療疾之功

頗無倫次時珍曰此即海藥本草也凡六卷唐人李珣所撰珣蓋肅代時人收采海藥亦頗詳明○
又鄭虔有胡本草七卷
皆胡中藥物今不傳

四聲本草禹錫曰唐蘭陵處士蕭炳撰取本草藥名上一字以平上去入四聲相從以便

討閱無所發明凡五
卷進士王收序之

刪繁本草禹錫曰唐潤州醫博士兼節度隨軍楊損之撰刪去本草不急及有名未用之

類為五卷開元以後
後人也無所發明

本草音義時珍曰凡二卷唐李含光撰又甄立言殷子嚴皆有音義

本草性事類禹錫曰京兆醫工杜善方撰不詳何代人凡一卷以本草藥名隨類解釋

附以諸藥制使畏惡
相反相宜解毒者

食性本草

禹錫曰南唐陪戎副尉劍州醫學助教陳士良撰取神農陶隱居蘇恭孟詵陳

藏器諸家藥關於飲食者類之附以食醫諸方及

四時調養臟腑之法時珍曰書凡十卷總集舊說

無甚新義古有淮南王食經一百二十卷崔浩食

經九卷竺暄食經十卷膳饌養療二十卷咎殷食

醫心鑑三卷婁居中食治通說一卷陳直奉親

養老書二卷並有食治諸方皆祖食醫之意也

蜀本草

時珍曰蜀主孟昶命翰林學士韓保昇等與諸醫士取唐本草參校增補註釋別為

圖經凡二十卷昶自為序世謂之蜀本草

草其圖說藥物形狀頗詳于陶蘇也

開寶本草

時珍曰宋太祖開寶六年命尚藥奉御劉翰道士馬志等九人取唐蜀本草詳

校仍取陳藏器拾遺諸書相參刊正別名增藥一

百三十三種馬志為之註解翰林學士盧多遜等

刊正七年復詔志等重定學士李助等看詳凡神

農者白字名醫所傳者墨字別之并目錄共二十

一卷序曰三墳之書神農預其一百藥既辨本草
存其錄舊經三卷世所流傳名醫別錄互為編纂
至梁貞白先生陶宏景乃以別錄參其本經朱墨
雜書時謂明白而又攷彼功用為之註釋列為七
卷南國行焉逮乎有唐別加參校增藥八百餘味
添註為二十一卷本經漏缺則補之陶氏誤說則
證之然而載歷年祀又踰四百朱字墨字无本得
同舊註新註其文互缺非聖主撫大同之運永無
疆之休其何以改而正之哉乃命盡攷傳誤刊為
定本類例非允從而革焉至于筆頭灰兔毫也而
在草部今移附兔頭骨之下半天河地漿皆水也
亦在草部今移附玉石類之間敗鼓皮移附于獸
皮胡桐淚改從于木類紫鑛亦木也自玉石品而
取焉伏翼實禽也由蟲魚部而移焉橘柚附于果
實食鹽附于光鹽生薑乾薑同歸一說至于雞腸
繫縷陸英蒴藿以類相似從而附之仍采陳藏器
拾遺李含光音義或討源于別本或傳效于醫家
參而較之辨其臧否至于突厥白舊說灰類也今

是木根天麻根解以赤箭今又全異去非取是特
立新條其餘刊正不可悉數下采眾議定為印板
乃以白字為神農所說墨字為名醫所傳唐附今
附各加顯註詳其解釋審其形性證謬誤而辨之
者署為今註攷文記而述之者又為今按義既刊
定理亦詳明今以新舊藥合九百八十三種并目
錄二十一卷廣頌
天下傳而行焉

嘉祐補註本草

時珍曰宋仁宗嘉祐二年詔光祿

卿直祕閣掌禹錫尙書祠部郎中
祕閣校理林億等同諸醫官重脩本草新補八十
二種新定一十七種通計一千八十二條謂之嘉
祐補註本草共二十卷其書雖有校脩無大發明
其序畧云神農本草經三卷藥止三百六十五種
至陶隱居又進名醫別錄亦三百六十五種因而
註釋分為七卷唐蘇恭等又增一百一十四種廣
為二十卷謂之唐本草朝開寶中兩詔醫工劉
翰道士馬志等脩增一百三十三種為開寶本草

偽蜀孟昶亦常命其學士韓保昇等稍有增廣謂
之蜀本草嘉祐二年八月詔臣禹錫臣億等再加
校正臣等被命遂更研覈竊謂前世醫工原診用
藥隨效輒記遂至增多槩見諸書浩博難究雖屢
加刪定而去取非一或本經已載而所述粗畧或
俚俗常用而太醫未聞嚮非因事詳著則遺散多
矣乃請因其疏摠更爲補註因諸家醫書藥譜所
載物品功用並從採掇惟名近迂僻類乎怪誕則
所不取其餘經史百家雖非方餌之急其閒或有
參說藥驗較然可據者亦兼收載務從該洽以副
詔意凡名本草者非一家今以開寶重定本爲正
其分布卷類經註雜糅閒以朱墨並從舊例不復
釐改凡補註並據諸書所說其意義與舊文相參
者則從刪削以避重複其舊已著見而意有未完
後書復言亦具存之欲詳而易曉仍每條並以朱
書其端云臣等謹按某書云某事其別立條者則
解于其末云見某書凡所引書唐蜀二本本草爲先
他書則以所著先後爲次第凡書舊名本草者今

所引用但著其所作人名曰某惟唐蜀本則曰唐
 本云蜀本云凡字朱墨之別所謂神農本經者以
 朱字名醫因神農舊條而有增補者以墨字間于
 朱字餘所增者皆別立條並以墨字凡陶隱居所
 進者謂之名醫別錄並以其註附於未凡顯慶所
 增者亦註其末曰唐本先附凡開寶所增者亦注
 其末曰今附凡今所增補舊經未有于逐條後開
 列云新補凡藥舊分上中下三品今之新補難于
 詳辨但以類附見如綠礬次于礬石山薑花次于
 豆蔻扶移次于水楊之類是也凡藥有功用本經
 未見而舊註已會引註今之所增但涉相類更不
 立條並附本註之末曰續註如地衣附于垣衣燕
 覆附于通草馬藻附于海藻之類是也凡舊註出
 于陶氏者曰陶隱居云出于顯慶者曰唐本註出
 于開寶者曰今註其開寶攷據傳記者別曰今按
 今詳又按皆以朱字別書于其端凡藥名本經已
 見而功用未備今有所益者亦附于本註之末凡
 藥有今世已嘗用而諸書未見無所辨證者如胡

蘆巴海帶之類則請從太醫眾論參議別立為條
曰新定舊藥九百八十三種新補八十二種附于
註者不預焉新定一十七種總新舊一千八十二
條皆隨類附著之英公陶氏開寶三序皆有義例
所不可去仍
載于首卷云

圖經本草

時珍曰宋仁宗既命掌禹錫等編繹本

藥物用唐永徽故事專命太常博士蘇頌撰述成
此書凡二十一卷攷證詳明頗有發揮但圖與說
異兩不相應或有圖無說或有物失圖或說是圖
非如江州拔萁乃仙遺糧滁州青木香乃兜鈴根
俱混列圖棠毬子即赤木瓜天花粉即栝樓根乃
重出條之類亦其小小疎漏耳頌字子容同安人
舉進士哲宗朝位
至丞相封魏國公

證類本草

時珍曰宋徽宗大觀二年蜀醫唐慎微
取嘉祐補註本草及圖經本草合為一

本草綱目卷之十一
書復拾唐本草陳藏器本草孟詵食療本草舊本
所遺者五百餘種附入各部并增五種仍采雷公
炮炙及唐本食療陳藏器諸說收未盡者附于各
條之後又采古今單方并經史百家之書有關藥
物者亦附之共三十一卷名證類本草上之朝廷
改名大觀本草慎微貌寢陋而學該博使諸家本
草及各藥單方垂之千古不致淪沒者皆其功也
政和中復命醫官曹孝忠校正刊行故又謂之政
和本

本草別說

時珍曰宋哲宗元祐中閻中醫士陳承
合本草及圖經二書為一閒綴數語謂

之別說高宗紹興末命醫官王繼先等
校正本草亦有所附皆淺俚無高論

日華諸家本草

禹錫曰國初開寶中明人撰不著
姓氏但云日華子大明序集諸家

本草近世所用藥各以寒温性味華實蟲獸為類
其言功用甚悉凡二十卷時珍曰按十家姓大姓

出東萊日華子蓋姓大名明也或云其姓田未審然否

本草衍義

時珍曰宋政和中醫官通直郎寇宗奭撰以補註及圖經二書參攷事實覈其

情理援引辨證發明良多東垣丹溪諸公亦尊信之但以蘭花為蘭草卷丹為百合是其誤也書及

序列凡三卷平陽張魏卿以其說分附各藥之下合為一書

潔古珍珠囊

時珍曰書凡一卷金易州明醫張元素所著元素字潔古舉進士不第去

學醫深闡軒岐祕奧參悟天人幽微言古方新病不相能自成家法辨藥性之氣味陰陽厚薄升降

浮沈補瀉六氣十二經及隨證用藥之法立為主治祕訣心法要旨謂之珍珠囊大揚醫理靈素之

下一人而已後人翻為韻語以便記誦謂之東垣珍珠囊謬矣惜乎止論百品未及徧評又著病機

氣宜保命集四卷一名活法機要後人誤作河閒劉完素所著偽撰序文詞調于卷首以附會之其

他潔古諸書多是後人依託故駁雜不倫

用藥法象

時珍曰書凡一卷元真定明醫李杲所著杲字明之號東垣通春秋書易忠信

有守富而好施援例為濟源監稅官受業于潔古
老人盡得其學益加闡發人稱神醫祖潔古珍珠
囊增以用藥凡例諸經嚮導綱要活法著為此書
謂世人惑于內傷外感混同施治乃辨其脈證元
氣陰火飲食勞倦有餘不足著辨惑論三卷脾胃
論三卷推明素問難經本草脈訣及雜病方論著
醫學發明九卷蘭室祕藏五卷辨析經絡脈法分
比傷寒六經之則著此事難知二卷別有癰疽眼
目諸書及試效方皆其門人所集述者也

湯液本草

時珍曰書凡二卷元醫學教授古趙王好古撰好古字進之號海藏東垣高弟

醫之儒者也取本草及張仲景成無己張潔古李
東垣之書閒附己意集而為此別著湯液大法四

卷醫壘元戎十卷陰證畧例
癩論萃英錢氏補遺各一卷

日用本草

時珍曰書凡八卷元海甯醫士吳瑞取
本草之切于飲食者分爲八門閒增數

品而已瑞字瑞
卿元文宗時人

本草諧括

時珍曰元瑞州路醫學教授胡仕可取
本草藥性圖形作諧以便童蒙者我明

劉純熊宗立傳滋輩皆有諧
括及藥性賦以授初學記誦

本草衍義補遺

時珍曰元末朱震亨所著震亨義
烏人字彥脩從許白雲講道世稱

丹溪先生嘗從羅太無學醫遂得劉張李三家之
旨而推廣之爲醫家宗主此書蓋因寇氏衍義之

義而推衍之近二百種多所發明但蘭草之爲蘭
花胡粉之爲錫粉未免泥于舊說而以諸藥分配

五行失之牽強耳所著有格致餘論局方發
揮傷寒辨疑外科精要新論風木問答諸書

本草發揮

時珍曰書凡三卷洪武時丹溪弟子山陰徐彥純用誠所集取張潔古李東垣

王海藏朱丹溪成無己數家之說合成一書爾別無增益

救荒本草

時珍曰洪武初周憲王因念旱澇民饑咨訪野老田夫得草木之根苗花實可

備荒者四百四十種圖其形狀著其出產苗葉花子性味食法凡四卷亦頗詳明可據近人翻刻削

其大半雖其見淺亦書之一厄也王號誠齋性質聰敏集普濟方一百六十八卷袖珍方四卷詩文

樂府等書嘉靖中高郵王磐著野菜譜一卷繪形綴語以告救荒畧而不詳

庚辛玉冊

時珍曰宣德中甯獻王取崔昉外丹本草土宿真君造化指南獨孤滔丹房鑑

源軒轅述寶藏論青霞子丹臺錄諸書所載金石草木可備丹爐者以成此書分爲金石部靈苗部

靈植部羽毛部鱗甲部飲饌部鼎器部通計二卷凡五百四十一品所說出產形狀分別陰陽亦可

考據焉王號臞仙該通百家所著醫卜農圃琴棋
仙學詩家諸書凡數百卷造化指南三十三篇載
靈草五十三種云是土宿昆元真君所說抱朴子
注解蓋亦宋元時方士假託者爾古有太清草木
方太清服食經太清丹藥錄黃白祕法三
十六水法伏制草石論諸書皆此類也

本草集要

時珍曰宏治中禮部郎中慈谿王綸取
本藥用藥品及潔古東垣丹溪所論

也序例畧節為八卷別無增益斤斤泥古者
也綸字汝言號節齋舉進士仕至都御史

食物本草

時珍曰正德時九江知府江陵汪穎撰
東陽盧和字廉夫嘗取本草之繫于食

品者編次此書穎得其稿釐為二卷
分爲水穀菜果禽獸魚味八類云

食鑑本草

時珍曰嘉靖時京口甯原所編取
可食之物畧載數語無所發明

本草會編

時珍曰嘉靖中祁門醫士汪機所編機
字省之懲王氏本草集要不收草木形

狀乃削去本草上中下三品以類相從菜穀通為
草部果品通為木部并諸家序例共二十卷其書
撮約似乎簡便而混同反難檢閱冠之以薺識陋
可知掩去諸家更覺零碎臆度疑似殊無實見僅
有數條自得可取爾

本草蒙筌

時珍曰書凡十二卷祁門醫士陳嘉謨撰謨字廷采嘉靖末依王氏集要部次

集成每品具氣味產采治療方法創成對語以便
記誦閒附己意于後頗有發明便于初學名曰蒙
筌誠稱其實

本草綱目

明楚府奉祠敕封文林郎蓬溪知縣蘄州李時珍東璧撰蒐羅百氏訪采四方

始于嘉靖壬子終于萬曆戊寅稿凡三易分為五
十二卷列為一十六部部各分類類凡六十標名
為綱列事為目增藥三百七
十四種方八千一百六十

引據古今醫家書目

時珍曰自陶宏景以下唐宋諸本草引用醫書凡八十四家而唐慎微居多時珍今所引除舊本外凡二百七十七家

黃帝素問

王冰註

唐玄宗開元廣濟方

天寶單方圖

唐德宗貞元廣利方

太倉公方

宋太宗太平聖惠方

扁鵲方

三卷

張仲景金匱玉函方

華陀方

十卷

張仲景傷寒論

成無己註

支太醫方

張文仲隨身備急方

徐文伯方

初虞世古今錄驗方

秦承祖方

王燾外臺祕要方

華陀中藏經

姚和眾延齡至寶方

范汪東陽方

孫真人千金備急方

孫真人食忌

孫真人千金翼方

孫真人枕中記

席延賞方

孫真人千金髓方

葉天師枕中記

篋中祕寶方

許孝宗篋中方

錢氏篋中方

劉禹錫傳信方

王紹顏續傳信方

延年祕錄

柳州救三死方

李絳兵部手集方

御藥院方

崔行功纂要方

劉涓子鬼遺方

乘閒集效方

陳延之小品方

葛洪肘後百一方

服氣精義方

謝士泰刪繁方

胡洽居士百病方

孫兆口訣

梅師集驗方

崔元亮海上集驗方

深師腳氣論

師卽梅

姚僧坦集驗方

孫氏集驗方

孟詵必效方

平堯卿傷寒類要

斗門方

韋宙獨行方

王珉傷寒身驗方

勝金方

文潞公藥準

周應簡要濟眾方

塞上方

王袞博濟方

沈存中靈苑方

救急方

張路大效方

崔知悌勞瘵方

近效方

陳抃經驗方

陳氏經驗後方

蘇沈良方

東坡存中

十全博救方

普殷食醫心鏡

必用方

張傑子母祕錄

楊氏產乳集驗方

普殷產寶

譚氏小兒方

小兒宮氣方

萬全方

太清草木方

李翱何首烏傳

普救方

神仙服食方

嵩陽子威靈仙傳

寒食散方

賈相公牛經

賈誠馬經

已上八十四家
係舊本所引

靈樞經

王冰玄密

張杲醫說

黃帝書

褚氏遺書

李濂醫史

秦越人難經

聖濟總錄

劉氏病機賦

皇甫謐甲乙經

宋徽宗聖濟經

劉克用藥性賦

王叔和脈經

張仲景金匱要略

彭祖服食經

巢元方病原論

神農食忌

神仙服食經

宋俠經心錄

魏武帝食制

李氏食經

王執中資生經

婁居中食治通說

飲膳正要

劉河閒原病式

太清靈寶方

玄明粉方

劉河閒宣明方

戴起宗脈訣刊誤

吳猛服椒訣

許洪本草指南

黃氏本草權度

陸氏證治本草

土宿真君造化指南

醫餘錄

月池人參傳

李言聞

胡演升鍊丹藥祕訣

名醫錄

月池艾葉傳

張子和儒門事親

張潔古醫學啟源

菖蒲傳

醫鑑

龔信

活法機要

楊天惠附子傳

潔古家珍

李東垣醫學發明

東垣辨惑論

東垣脾胃論

東垣蘭室祕藏

東垣試效方

王海藏醫家大法

海藏醫壘元戎

海藏此事難知

海藏陰證發明

羅天益衛生寶鑑

丹溪格致餘論

丹溪局方發揮

盧和丹溪纂要

丹溪醫案

楊珣丹溪心法

方廣丹溪心法附餘

丹溪活套

程充丹溪心法

滑伯仁櫻甯心要

惠民和劑局方

陳言三因方

孫真人千金月令方

嚴用和濟生方

王氏易簡方

王碩

楊子建萬全護命方

繼洪澹寮方

是齋指迷方

王

楊士瀛仁齋直指方

余居士選奇方

黎居士易簡方

楊氏家藏方

楊

濟生拔萃方

杜思敬

胡澗衛生易簡方

朱端章衛生家寶方

許學士本事方

許叔微

雞峰備急方

張銳

孫用和傳家祕寶方

王隱君養生主論

真西山衛生謨

趙士衍九籥衛生方

王方慶嶺南方

嶺南衛生方

初虞世養生必用方

周憲王普濟方

一百七十卷

虞搏醫學正傳

李仲南永類鈴方

周憲王袖珍方

傅滋醫學集成

薩謙齋瑞竹堂經驗方

王履源洄集

葉氏醫學統旨

萬表積善堂經驗方

戴原禮證治要訣

醫學綱目

孫氏仁存堂經驗方

戴原禮金匱鉤玄

醫學指南

楊氏頤真堂經驗方

劉純玉機微義

醫學切問

陸氏積德堂經驗方

劉純醫經小學

王璽醫林集要

德生堂經驗方

臞仙乾坤祕韞

饒氏醫林正宗

法生堂經驗方

臞仙乾坤生意

周良采醫方選要

劉松石保壽堂經驗方

窺玄子法天生意

楊拱醫方摘要

陳日華經驗方

梁氏總要

醫方大成

王仲勉經驗方

吳球活人心統

方賢奇效良方

劉長春經驗方

吳球諸證辨疑

閻孝忠集效方

禹講師經驗方

趙氏儒醫集要

孫天仁集效方

戴古渝經驗方

瀕湖醫案

試效錄驗方

龔氏經驗方

瀕湖集簡方

經驗濟世方

藺氏經驗方

楊起簡便方

孫一松試效方

阮氏經驗方

坦仙皆效方

董炳集驗方

趙氏經驗方

危氏得效方

危亦林

朱端章集驗方

楊氏經驗方

居家必用方

經驗良方

唐瑤經驗方

鄧筆峯衛生雜興

救急易方

張氏經驗方

王英杏林摘要

急救良方

龔氏經驗方

白飛霞韓氏醫通

白飛霞方外奇方

徐氏家傳方

張三丰仙傳方

溫隱居海上方

鄭氏家傳方

王氏奇方

海上仙方

談野翁試驗方

丘瓊山羣書日抄

海上名方

包會應驗方

何子元羣書續抄

十便良方

孟氏詵詵方

張氏灑江切要

李樓怪證奇方

生生編

邵真人青囊雜纂

夏子益奇疾方

摘玄方

趙宜真濟急仙方

纂要奇方

端效方

王永輔惠濟方

本草綱目序例
卷一
奚囊備急方

史堪指南方

王璆百一選方

臞仙壽域神方

陳直奉親養老書

世醫通變要法

吳旻扶壽精方

李廷飛三元延壽書

何大英發明證治

王良醫方捷徑

保慶集

保生餘錄

神醫普救方

楊炎南行方

彭用光體仁彙編

傳信適用方

王氏究源方

王節齋明醫雜著

攝生妙用方

艾元英如宜方

濟生祕覽

王氏手集

蕭靜觀方

錦囊祕覽

唐仲舉方

楊堯輔方

金匱名方

嚴月軒方

鄭師甫方

芝隱方

通妙真人方

三十六黃方

葛可久十藥神書

蘇道玄感傳尸論

上清紫庭追勞方

朱肱南陽活人書

韓祇和傷寒書

龐安時傷寒總病論

吳綬傷寒蘊要

趙嗣真傷寒論

成無己傷寒明理論

劉河閒傷寒直格

陶華傷寒六書

李知先活人書括

陳自明婦人良方

郭稽中婦人方

熊氏婦人良方補遺

胡氏濟陰方

婦人明理論

婦人千金家藏方

便產須知

二難寶鑑

婦人經驗方

錢乙小兒直訣

劉昉幼幼新書

幼科類萃

陳文中小兒方

曾世榮活幼心書

徐用宣袖珍小兒方

張煥小兒方

寇衡全幼心鑑

演山活幼口議

阮氏小兒方

魯伯嗣嬰童百問

活幼全書

鄭氏小兒方

湯衡嬰孩寶鑑

衛生總微論 即保幼大全

鮑氏小兒方

湯衡嬰孩妙訣

姚和眾童子祕訣

全嬰方

王日新小兒方

小兒宮氣集

魏直博愛心鑑

高武痘疹管見

又名正宗

李言聞痘疹證治

痘疹要訣

李實痘疹淵源

聞人規痘疹

八十一論

張清川痘疹便覽

陳自明外科精要

薛己外科心法

外科通玄論

齊德之外科精義

薛己外科發揮

薛己外科經驗方

楊清叟外科祕傳

李迅癰疽方論

周良采外科集驗方

眼科龍木論

飛鴻集

倪惟德原機啟微集

明目經驗方

宣明眼科

眼科鍼鈎方

咽喉口齒方

已上二百七十七家時珍所引者

引據古今經史百家書目

時珍曰自陶宏景唐宋以下所引用者凡一百五十一家時珍所引用者除舊本外凡四百四十家

易經注疏

王弼

詩經注疏

孔穎達毛萇

爾雅注疏

李巡邢昺郭璞

尚書注疏

孔安國

春秋左傳注疏

杜預

孔子家語

禮記注疏

鄭玄

周禮注疏

張湛注列子

郭象注莊子

楊倞注荀子

淮南子鴻烈解

呂氏春秋

葛洪抱朴子

戰國策

司馬遷史記

班固漢書

范曄後漢書

陳壽三國志

王隱晉書

沈約宋書

蕭顯明梁史

李延壽北史

魏徵隋書

歐陽修唐書

王瓘軒轅本紀

穆天子傳

秦穆公傳

蜀王本紀

魯定公傳

漢武故事

漢武內傳

壺居士傳

崔魏公傳

李寶臣傳

何君謨傳

李孝伯傳

李司封傳

柳宗元傳

梁四公子記

唐武后別傳

南岳魏夫人傳

三茅眞君傳

葛洪神仙傳

干寶搜神記

紫靈元君傳

劉向列仙傳

徐鉉稽神錄

玄中記

洞微志

郭憲洞冥記

樂史廣異記

劉敬叔異苑

王子年拾遺記

太平廣記

吳均續齊諧記

段成式酉陽雜俎

異術

王建平典術

杜祐通典

異類

何承天纂文

張華博物志

魏略

東方朔神異經

盛宏之荊州記

郭璞注山海經

何晏九州記

宗懔荊楚歲時記

華山記

顧微廣州記

徐表南州記

嵩山記

裴淵廣州記

萬震南州異物志

南蠻記

楊孚異物志

房千里南方異物志

五真編目月例
卷一
三

太原地志

劉恂嶺表錄

孟瑄嶺南異物志

永嘉記

朱應扶南記

張氏燕吳行紀

南城志

五溪記

王氏番禺記

白澤圖

軒轅述寶藏論

青霞子丹臺錄

斗門經

獨孤滔丹房鑑源

東華真人煑石法

房室圖

太清草木記

神仙芝草經

異魚圖

太清石壁記

靈芝瑞草經

狐剛子鍊粉圖

魏王花木志

夏禹神仙經

四時纂要

賈思勰音叶齊民要術

三洞要錄

郭義恭廣志

汜勝之種植書

八帝聖化經

崔豹古今注

丁謂天香傳

八帝玄變經

陸機詩義疏

陸羽茶經

神仙感應篇

本草綱目序例
卷一
李畋該聞錄

張鷟朝野僉載

神仙祕旨

楊億談苑

開元天寶遺事

修真祕旨

宣政錄

鄭氏明皇雜錄

穎陽子修真祕訣

五行書

孫光憲北夢瑣言

左慈祕訣

廣五行記

歐陽公歸田錄

陶隱居登真隱訣

遁甲書

沈括夢溪筆談

耳珠先生訣

龍魚河圖

景煥野人閑話

韓終采藥詩

王充論衡

黃休復茆亭客話

金光明經

顏氏家訓

范子計然

宋齊丘化書

楚辭

李善注文選

張協賦

本事詩

江淹集

宋王微讚

庾肩吾集

陳子昂集

陸龜蒙詩

梁簡文帝勸醫文 已上一百五十一家舊本所引者

許慎說文解字 呂忱字林

周弼六書正譌 周弼說文字原

王安石字說 趙古則六書本義

顧野王玉篇 孫愐唐韻

魏子才六書精蘊 倉頡解詁

丁度集韻 黃公武古今韻會

洪武正韻 陰氏韻府羣玉

包氏續韻府羣玉 急就章

張揖廣雅

孫炎爾雅正義

孔鮒小爾雅

曹憲博雅

羅願爾雅翼

揚雄方言

陸佃埤雅

埤雅廣義

劉熙釋名

司馬光名苑

陸機鳥獸草木蟲魚疏

師曠禽經

袁達禽蟲述

淮南八公相鶴經

黃省曾獸經

王元之蜂記

朱仲相貝經

龜經

張世南質龜論

鍾毓果然賦

馬經

傅肱蟹譜

李石續博物志

韓彥直橘譜

毛文錫茶譜

唐蒙博物志

蔡襄荔枝譜

蔡宗顏茶對

張華感應類從志

歐陽修牡丹譜

劉貢父芍藥譜

贊甯物類相感志

范成大梅譜

范成大菊譜

楊泉物理論

劉蒙泉菊譜

史正志菊譜

王佐格古論

陳翥桐譜

沈立海棠譜

天玄主物簿

陳仁玉菌譜

王西樓野菜譜

穆脩靖靈芝記

戴凱之竹譜

葉廷珪香譜

李德裕平泉草木記

僧贊甯竹譜

洪駒父香譜

周敘洛陽花木記

蘇易簡紙譜

蘇氏筆譜

洛陽名園記

蘇氏硯譜

蘇氏墨譜

張杲丹砂祕訣

杜季陽雲林石譜

九鼎神丹祕訣

張杲玉洞要訣

李德裕黃冶論

昇玄子伏汞圖

桓寬鹽鐵論

大明一統志

韋述兩京記

寶貨辨疑

太平寰宇記

祝穆方輿要覽

稽含南方草木狀

逸周書

酈道元注水經

沈瑩臨海水土記

汲冢竹書

陸禋續水經

臨海異物志

左氏國語

三輔黃圖

陳祈暢異物志

謝承續漢書

三輔故事

曹叔雅異物志

法盛晉中興書

張勃吳錄

薛氏荆揚異物志

後魏書

環氏吳紀

萬震涼州異物志

南齊書

東觀祕記

劉欣期交州記

唐會要

劉義慶世說

范成大桂海虞衡志

五代史

世本

東方朔林邑記

南唐書

類編

東方朔十洲記

宋史

逸史

任豫益州記

遼史

野史

宋祁劍南方物贊

元史

費信星槎勝覽

周達觀真臘記

吾學編

顧玠海槎錄

劉郁出使西域記

大明會典

朱輔山溪蠻叢話

袁滋雲南記

太平御覽

陳彭年江南別錄

永昌志

冊府元龜

江南異聞錄

蜀地志

集事淵海

李肇國史補

華陽國志

馬端臨文獻通攷

楚國先賢傳

茅山記

白孔六帖

葛洪西京雜記

太和山志

古今事類合璧

周密齊東野語

西涼記

祝穆事文類聚

周密癸辛雜志

荆南記

歐陽詢藝文類聚

周密浩然齋日鈔

永州記

鄭樵通志

周密志雅堂雜鈔

南裔記

陶九成說郛

羅大經鶴林玉露

竺法真羅浮山疏

虞世南北堂書鈔

陶九成輟耕錄

田汝成西湖志

賈似道悅生隨鈔

葉盛水東日記

南郡記

徐堅初學記

徐氏總龜對類

伏深齊地記

文苑英華

邵桂子甕天語

郡國志

錦繡萬花谷

毛直方詩學大成

鄴中記

洪邁夷堅志

蘇子仇池筆記

廉州記

淮南萬畢術

鮮于樞鈎玄

辛氏三秦記

高氏事物紀原

松窓雜記

金門記

伏侯中華古今注

杜寶大業拾遺錄

周處風土記

應劭風俗通

蘇鶚杜陽編

嵩高記

班固白虎通

方勺泊宅編

襄沔記

服虔通俗文

方鎮編年錄

鄧顯明南康記

顏師古刊謬正俗

楊慎丹鉛錄

方國志

杜臺卿玉燭寶典

劉績霏雪錄

荀伯子臨川記

河圖玉版

葉夢得水雲錄

洪邁松漠紀聞

河圖括地象

孫柔之瑞應圖記

河湖紀聞

春秋題辭

許善心符瑞記

王安貧武陵記

春秋連斗樞

夏小正

趙蔡行營雜記

春秋元命包

權寔四時月令

張匡業行程記

春秋考異郵

月令通纂

金幼孜北征錄

禮斗威儀

王楨農書

張師正倦游錄

孝經援神契

王旻山居錄

段公路北戶錄

周易通卦驗

山居四要

胡嶠陷盧記

京房易占

居家必用

隋煬帝開河記

劉向洪範五行傳

便民圖纂

玉策記

遁甲開山圖

劉伯溫多能鄙事

述征記

南宮從峻樓神書

臞仙神隱書

任昉述異記

皇極經世書

務本新書

祖沖之述異記

性理大全

俞宗本種樹書

辭用弱集異記

五經大全

起居雜記

陳翔卓異記

通鑑綱目

洞天保生錄

神異記

程氏遺書

林洪山家清供

李元獨異志

朱子大全

閨閣事宜

錄異記

老子

陳元靚事林廣記

戴祚甄異傳

鵠冠子

事海文山

異聞記

管子

萬寶事山

祖台之志怪

墨子

奚囊雜纂

陶氏續搜神記

晏子春秋

三洞珠囊

楊氏洛陽伽藍記

董子

陶隱居雜錄

太上玄科

賈誼新書

西樵野記

太清外術

韓詩外傳

琅琊漫鈔

魯至剛俊靈機要

劉向說苑

姚福庚巳編

地鏡圖

杜恕篤論

王清明揮塵餘話

五雷經

盧諶祭法

景煥牧豎閑談

雷書

王獻炙轂子

陳霆兩山墨談

乾象占

葉世傑草木子

韋航細談

列星圖

梁元帝金樓子

孫升談圃

演禽書

蔡邕獨斷

龐元英談藪

吐納經

王浚川雅述

愛竹談藪

謝道人天空經

章俊卿山堂考索

彭乘墨客揮犀

魏伯陽參同契

洪邁容齋隨筆

蔡條鐵圍山叢話

蕭了真金丹大成

百川學海

侯延賞退齋閑覽

許真君書

翰墨全書

遜齋閑覽

陶宏景真誥

文系

顧文薦負暄錄

朱真人靈驗篇

朱子離騷辨證

陸文量菽園雜記

太上玄變經

何孟春餘冬錄

王性之揮塵錄

李筌太白經注

黃震慈溪日鈔

趙與時賓退錄

八草靈變篇

類說

葉石林避暑錄

鶴頂新書

吳淑事類賦

劉禹錫嘉話錄

造化指南

左思三都賦

姚亮西溪叢話

脩真指南

葛洪遐觀賦

俞琰席上腐談

周顛仙碑

魯褒錢神論

胡仔漁隱叢話

劉根別傳

綦母錢神論

熊太古冀越集

法華經

稽康養生論

王濟日詢手記

涅槃經

王之綱通微集

李氏仕學類鈔

圓覺經

儲詠祛疑說

周必大陰德錄

楞嚴經

文字指歸

翰苑叢記

變化論

造化權輿

解頤新語

自然論

潘塤楮記室

趙潛養疴漫筆

劉義慶幽明錄

仇遠稗史

江隣幾雜志

百感錄

魏武帝集

張耒明道雜志

海錄碎事

魏文帝集

唐小說

瑣碎錄

曹子建集

林氏小說

治聞說

韓文公集

晁以道客話

龍江錄

柳子厚文集

劉跂暇日記

靈仙錄

歐陽公文集

康譽之昨夢錄

白獺髓

三蘇文集

邢坦齋筆衡

異說

宛委錄

蘇黃手簡

張世南游宦紀聞

高氏蓼花洲閑錄

山谷刀筆

何遠春渚紀聞

畢氏幕府燕閑錄

李太白集

東坡詩集

吳澄草廬集

杜子美集

黃山谷集

吳萊淵穎集

王維詩集

宋徽宗詩

楊維禎鐵厓集

岑參詩集

王元之集

宋景濂潛溪集

錢起詩集

梅堯臣詩集

方孝孺遜志齋集

白樂天長慶集

王荊公臨川集

吳玉崑山小稿

元稹長慶集

邵堯夫集

陳白沙集

劉禹錫集

周必大集

何仲默集

張籍詩集

楊萬里誠齋集

張東海集

李紳文集

范成大石湖集

楊升庵集

李義山集

陸放翁集

唐荆川集

左貴嬪集

陳止齋集

焦希程集

王梅溪集

張宛丘集

方虛谷集

葛氏韻語陽秋

蔡氏詩話

古今詩話

錦囊詩對

已上四百四十家時珍所引者

采集諸家本草藥品總數

神農本草經三百四十七種

除併入一百六十四種外

穀部七種

木部四十四種

菜部一十三種

土部二種

果部一十一種

金石部四十一種

蟲部二十九種
禽部五種
獸部一十五種
介部八種
鱗部七種
人部一種

陶宏景名醫別錄三百七種
除併入五十九種外

穀部二十九種
木部二十三種
菜部一十七種
服器部四種
果部一十七種
水部二種

土部三種
介部五種
鱗部十種
禽部一十種
蟲部一十七種
獸部

人部五種

李當之藥錄一種
草部

吳普本草一種
草部

雷斅炮炙論一種
獸部

蘇恭唐本草一百一十一種
草部三十四種
菜部七種
穀

本草綱目卷之七
採集諸家本草藥品總數

果部一十一種
木部二十二種
服器部三種
介部
土部三種
金石部一十四種
蟲部一種

部二種
鱗部一種
禽部二種
獸部八種
人部一種

甄權藥性本草四種
草部一種
穀部一種
服
器部一種
金石部一種

孫思邈千金食治二種
茶部

孟詵食療本草一十七種
草部二種
穀部三種
果部一種
菜部三種

鱗部六種
禽部二種

陳藏器本草拾遺三百六十八種
草部六十八種
穀部一十一種
菜部一十三種
果部二十種
木部三十九種
水部二十六種

服器部三十四種
火部一種
木部三十九種
水部二十六種

土部二十八種
金石部二十七種
蟲部二十種
介部十種
鱗部二十七種
禽部二十種

十六種 獸部一十
五種 人部八種

李珣海藥本草一十四種

草部四種 穀部一種
果部一種 木部五種

蟲部一種
介部二種

蕭炳四聲本草三種

草部一種 器部一種
土部一種

陳士良食性本草二種

菜部一種 果部一種

韓保昇蜀本草五種

菜部二種 獸部一種
木部一種

馬志開寶本草一百一十一種

草部三十七種 穀部二種
菜部

六種 果部一十九種

土部一種 金石部九種
木部十五種 蟲部二種
服器

介部二種 獸部四種

鱗部十一種 人部一種
禽

本草綱目卷之七 採集諸家本草藥品總數

掌禹錫嘉祐本草七十八種 草部一種 十七種 菜部十種 穀部

果部二種 木部六種 服器部一種 水部四種

種 金石部八種 介部八種 禽部一十三種

獸部一種 鱗部一種

人部四種

蘇頌圖經本草七十四種 草部五十四種 菜部四種 穀部

部五種 木部一種 金石部三種 蟲部

二種 介部一種 禽部一種 獸部一種

大明日華本草二十四種 草部七種 菜部二種 木部一種

金石部八種 蟲部一種 鱗部

一種 禽部一種 人部一種

唐慎微證類本草八種 菜部一種 木部一種 金石部一種

蟲部二種 獸部

一種 人部一種

寇宗奭本草衍義一種 獸部

李杲用藥法象一種 草部

朱震亨本草補遺四種 草部一種 木部一種 穀部一種 土部一種

吳瑞日用本草七種 穀部一種 果部二種 菜部三種 獸部一種

周憲王救荒本草二種 穀部一種 菜部一種

汪穎食物本草一十六種 穀部三種 果部一種 菜部二種 禽部十種

獸部
一種

甯原食鑑本草四種 鱗部一種 穀部一種 菜部一種 獸部一種

汪機本草會編三種 草部一種 蟲部一種 果部一種

陳嘉謨本草蒙筌二種 介部一種 人部一種

李時珍本草綱目三百七十六種 草部八十六種 穀部一十五種

菜部一十七種 果部三十三種 木部二十一種 服器部三十五種 火部十種 水部十一種

種 土部二十一種 金石部二十六種 鱗部二十八種 禽部

五種 獸部二十三種 人部一十三種

神農本經名例

上藥一百二十種為君主養命以應天無毒多服

久服不傷人欲輕身益氣不老延年者本上經

中藥一百二十種為臣主養性以應人無毒有毒

斟酌其宜欲遏病補虛羸者本中經

下藥一百二十五種為佐使主治病以應地多毒

不可久服欲除寒熱邪氣破積聚愈疾者本下經

三品合三百六十五種法三百六十五度一度應

一日以成一歲倍其數合七百三十名也陶宏景曰今按

上品藥性亦能遣疾但勢力和厚不為速效歲月

常服必獲大益病既愈矣命亦兼申天道仁育故

曰應天一百二十種者當謂寅卯辰巳之月法萬

物生榮時也中品藥性療病之辭漸深輕身之說

稍薄祛患為速延齡為緩人懷性情故曰應人一

百二十種當謂午未申酉之月法萬物成熟時也

下品藥性專主攻擊毒烈之氣傾損中和不可常

服疾愈即止地體收殺故曰應地一百二十五種

本草綱目卷之七 神農本草經名例 七

者當謂戊亥子丑之月法萬物枯藏時也兼以閏
 之盈數加之若單服或配隸自隨人患參而行之
 不必偏執也掌禹錫曰陶氏本草例神農以朱書
 別錄以墨書本經藥止三百六十五種今此言倍
 其數合七百三十名是併別錄副品而言此一節
 乃別錄之文傳寫既久錯亂所致遂令後世摭
 此類以為非神農之書率以此故也時珍曰神農
 本草藥分三品陶氏別錄倍增藥品始分部類唐
 宋諸家大加增補兼或退出雖有朱墨之別三品
 之名而實已紊矣或一藥而分數條或二物而同
 一處或木居草部或蟲入木部水土共居蟲魚雜
 處淄澗罔辨玉珉不分名已難尋實何由覓今則
 通合古今諸家之藥析為十六部當分者當併
 者併當移者移當增者增不分三品惟逐各部物
 以類從目隨綱舉每藥標一總名正大綱也大書
 氣味主治正小綱也分註釋名集解發明詳其目
 也而辨疑正誤附錄附之備其體也單方又附于
 其末詳其用也大綱之下明註本草及三品所以

原始也。小綱之下，明註各家之名，所以註實也。分註則各書人名一則古今之出處不沒一則各家之是非有歸。雖舊章似乎剖析而支脈更覺分明，非敢僭越實便討尋爾。

藥有君臣佐使以相宣攝合和宜一君二臣三佐

五使又可一君三臣九佐使也

宏景曰用藥猶如立人之制若多君

少臣多臣少佐則氣力不周也。然檢仙經世俗諸方亦不必皆爾。大抵養命之藥多君，養性之藥多臣。療病之藥多佐。猶依本性所主而復斟酌之上品。君中復有貴賤，臣佐之中亦復如之。所以藂冬遠志別有君臣甘草國老大黃將軍明其優劣皆不同秩也。岐伯曰方制君臣者主病之謂君，佐君之謂臣。應臣之謂使，非上中下三品之謂也。所以明善惡之殊貫也。張元素曰為君者最多為臣者次之，佐者又次之。藥之于證所主同者則各等分，或云力大者為君。李杲曰凡藥之所用皆以氣味

本草綱目卷之... 神農本草經名例

爲主補瀉在味隨時換氣主病爲君假令治風防
 風爲君治寒附子爲君治溼防己爲君治上焦熱
 黃芩爲君中焦熱黃連爲君兼見何證以佐使藥
 分治之此制方之要也本草上品爲君之說各從
 其宜爾

藥有陰陽配合子母兄弟

韓保昇曰凡天地萬物皆有陰陽大小各有色

類並有法象故羽毛之類皆生于陽而屬于陰鱗
 介之類皆生于陰而屬于陽所以空青法木故色
 青而主肝丹砂法火故色赤而主心雲母法金故
 色白而主肺雌黃法土故色黃而主脾慈石法水
 故色黑而主腎餘皆以此例推之子母
 兄弟若榆皮爲母厚朴爲子之類是也

根莖花實苗皮骨肉
元素曰凡藥根之在土中者
 中半已上氣脈之上行也以
 中半已下氣脈之下行也以
 入土者

生苗者爲根中半已下氣脈之下行也以入土者
 爲稍病在中焦與上焦者用根在下焦者用稍根

升梢降人之身半已上天之陽也用頭中焦用身
身半已下地之陰也用梢乃述類象形者也時珍
曰草木有單使一件者如羌活之根木通之莖款
冬之花葶藶之實敗醬之苗大青之葉大腹之皮
郁李之核蘖木之皮沈香之節蘇木之肌胡桐之
淚龍腦之膏是也有兼用者遠志小草蜀漆常山
之類是也有全用者枸杞甘菊之類是也有一物
兩用者當歸頭尾麻黃節根赤白茯苓牛膝春夏
用苗秋冬用根之類是也羽毛鱗介玉石
水火之屬往往皆然不可一律論也

有單行者有相須者有相使者有相畏者有相惡
者有相反者有相殺者凡此七情合和視之當用
相須相使者良勿用相惡相反者若有毒宜制可
用相畏相殺者不爾勿合用也

保昇曰本經三百六十五種中單行

者七十一種相須者十二種相使者九十種相畏者七十八種相惡者六十種相反者十八種相殺者三十六種凡此七情合和視之宏景曰凡檢舊方用藥亦有相惡相反者如仙方甘草丸有防己細辛俗方玉石散用栝樓乾薑之類服之乃不為害或有制持之者譬如寇賈輔漢程周佐吳大體既正不得以私情為害雖爾不如不用尤良半夏有毒須用生薑取其相畏相制也宗奭曰相反為害深于相惡者謂彼雖惡我無忿心猶如牛黃惡龍骨而龍骨得牛黃更良此有以制服故也相反者則彼我交讐必不和合今畫家用雌黃胡粉相近便自黯妬可證矣時珍曰藥有七情獨行者單方不用輔也相須者同類不可離也如人參甘草黃蘗知母之類相使者我之佐使也相惡者奪我之能也相畏者受彼之制也相反者兩不相合也相殺者制彼之毒也古方多有相惡相反者蓋相須相使同用者帝道也相畏相殺同用者王道也相惡相反同用者霸道也有經有權在用者

識悟爾

藥有酸鹹甘苦辛五味又有寒熱温涼四氣

宗奭曰凡

稱氣者是香臭之氣其寒熱温涼是藥之性且如
鷲白脂性冷不可言氣冷也四氣則是香臭腥臊
如蒜阿魏鮑魚汗襪則其氣臭雞魚鴨蛇則其氣
腥狐狸白馬莖人中白則其氣燥沈檀龍麝則其
氣香是也則氣字當改為性字于義方允時珍曰
寇氏言寒熱温涼是性香臭腥臊是氣其說與禮
記文合但自素問以來只以氣味言卒難改易姑
從舊爾好古曰味有五氣有四五味之中各有四
氣如辛則有石膏之寒桂附之熱半夏之温薄荷
之涼是也氣者天也味者地也温熱者天之陽寒
涼者天之陰辛甘者地之陽鹹苦者地之陰本草
五味不言淡四氣不言涼只言温大温熱大熱寒
大寒微寒平小毒大毒有毒無
毒何也淡附于甘微寒即涼也

及有毒無毒

岐伯曰病有久新方有大小有毒無毒固宜常制大毒治病十去其六常

毒治病十去其七小毒治病十去其八無毒治病

十去其九穀肉果菜食養盡之無使過之傷其正

也又曰耐毒者以厚藥不勝毒者以薄藥王冰云

藥氣有偏勝則臟氣有偏絕故十分去其六七八

九而止也

陰乾暴乾採造時月生熟

宏景曰凡採藥時月皆是建寅歲首則從漢太

初後所記也其根物多以二月八月採者謂春初

津潤始萌未充枝葉勢力溇濃也至秋枝葉乾枯

津潤歸流于下也大抵春甯宜早秋甯宜晚花實

莖葉各隨其成熟爾歲月亦有早晏不必都依本

文也所謂陰乾者就六甲陰中乾之也又依遁甲

法甲子旬陰中在癸酉以藥著酉地也實不必然

但露暴于陰影處乾之爾若可兩用益當為善孫

思邈曰古之醫者自解採取陰乾暴乾皆如法用

藥必依土地所以治病十愈八九今之醫者不知
採取時節至于出產土地新陳虛實所以治病十
不得五也馬志曰今按法陰乾者多惡如鹿茸陰
乾悉爛火乾且良草木根苗九月以前採者悉宜
日乾十月以後採者陰乾乃好時珍曰生產有南
北節氣有早遲根苗異收採製造異法度故市之
地黃以鍋煮熟大黃用火焙乾松黃和蒲黃樟腦
雜龍腦皆失制作偽者也孔志約云動植形生因
地舛性春秋節變感氣殊功離其本土則質同而
效異乖于採取則物是而時非名實既虛寒温多
謬施于君父逆莫大焉嘉謨曰醫藥貿易多在市
家諺云賣藥者兩眼用藥者一眼服藥者無眼非
虛語也古曠灰云死龍骨苜蓿根為土黃芪麝香
搗荔核攪藿香采茄葉雜煮半夏為玄胡索鹽松
稍為肉蓯蓉草仁充草豆蔻西呆代南木香熬廣
膠入蕎麪作阿膠煮雞子及魚魷為琥珀枇杷蕊
代款冬驢腳脛作虎骨松脂混騏驎竭番消和龍
腦香巧詐百般甘受其侮甚至殺人歸咎用藥乃

大關係非比尋常不可不慎也

土地所出真偽陳新並各有法

宏景曰諸藥所生皆的有境界秦漢

已前當言列國今郡縣之名後人所增爾江東以

來小小雜藥多出近道氣力性理不及本邦假令

荆益不通則全用歷陽當歸錢塘三建豈得相似

所以療病不及往人亦當緣此又且醫不識藥惟

聽市人市人又不辨究皆委採送之家傳習造作

真偽好惡並皆莫測所以鍾乳醋煑令白細辛水

漬使直黃芪蜜蒸為甜當歸酒灑取潤蜈蚣朱足

令赤螵蛸膠于桑枝以蛇牀當藤蕪以薺芑亂人

參此等既非事實合藥不量剝除只如遠志牡丹

纔不收半地黃薺冬三分耗一凡去皮除心之屬

分兩不應不知取足王公貴勝合藥之日羣下竊

換好藥終不能覺以此療病固難責效宗奭曰凡

用藥必須擇土地所出者則真用之有據如上黨

人參川西當歸濟州半夏華州細辛東壁土冬月

灰半天河水熱湯漿水之類其物至微其用至廣
蓋亦有理若不推究厥理治病徒費其功杲曰陶
隱居本草言狼毒積實橘皮半夏麻黃吳茱萸皆
須陳久者良其餘須精新也然大黃木賊荆芥芫
花槐花之類亦宜陳久不獨六陳也凡藥味須要
專精至元庚辰六月許伯威年五十四中氣本弱
病傷寒八九日熱甚醫以涼藥下之又食梨冷傷
脾胃四肢逆冷時發昏憤心下悸動吃噫不止面
色青黃目不欲開其脈動中有止時自還乃結脈
也用仲景復脈湯加人參肉桂急扶正氣生地黃
減半恐傷陽氣服二劑病不退再為診之脈證相
對因念莫非藥欠專精陳腐耶再市新藥與服其
證減半又服而安凡諸草木昆蟲產之有地根葉
花實採之有時失其地則性味少異失其時則氣
味不全又況新陳之不同精粗之不等倘不擇而
用之其不效者醫之過也唐耿漳詩云老醫迷舊
疾朽藥誤新方是矣
○歲物專精見後

藥性有宜丸者宜散者宜水煮者宜酒漬者宜膏

煎者亦有一物兼宜者亦有不可入湯酒者並隨

藥性不得違越

宏景曰又按病有宜服酒服膏煎者亦兼服用以為湯服酒服膏煎者亦兼服用以為

其制華陀曰病有宜湯宜丸者宜散者宜下者宜吐者宜汗者湯可以蕩滌臟腑開通經絡調和陰

陽丸可以逐風冷破堅積進飲食散可以去風寒暑溼之邪散五臟之結伏開腸胃可下而不下

使人腹脹滿煩亂可汗而不汗使人毛孔閉塞悶絕而終可吐而不吐使人結胸上喘水食不入

而用之丸者湯者蕩也去大病用之散者散也去急病用之丸者緩也舒緩而治之也

古無鐵刃以口咬細煎汁飲之則易升易散而行經絡也凡治至高之病加酒煎去溼以生薑補元

氣以大棗發散風寒以葱白去膈上痰以蜜細末者不循經絡止去胸中及臟腑之積氣味厚者白

湯調氣味薄者煎之和滓服去下部之病其丸極
大而光且圓治中焦者次之治上焦者極小稠麩
糊取其遲化直至中下或酒或醋取其散之意也
凡半夏南星欲去溼者丸以薑汁稀糊取其易化
也水浸宿炊餅又易化滴水丸又易化煉蜜丸者
取其遲化而氣循經絡也蠟丸取其難化而旋旋
取效或毒藥不傷脾胃也元素曰病在頭面及皮
膚者藥須酒炒在咽下躋上者酒洗之在下者生
用寒藥須酒浸曝乾恐傷胃也當歸酒浸助發散
之用也嘉謨曰製藥貴在適中不及則功效難求
太過則氣味反失火製四煅炮炙炒也水製三漬
泡洗也水火共製蒸煑二者焉法造雖多不離于
此酒製升提薑製發散入鹽走腎而軟堅用醋注
肝而住痛童便製除劣性而降下米泔製去燥性
而和中乳製潤枯生血蜜製甘緩益元陳壁土製
竊真氣驟補中焦麩麩皮製抑酷性勿傷上膈烏
豆湯甘草湯漬曝並解毒致令平和羊酥油豬脂
油塗燒咸滲骨容易脆斷去瓢者免脹抽心者除

煩大槩具陳
初學熟玩

欲療病先察其源先候病機五臟未虛六腑未竭

血脈未亂精神未散服藥必活若病已成可得半

愈病勢已過命將難全宏景曰自非明醫聽聲察

乎且未病之人亦無肯自療故齊侯怠于皮膚之

微以致骨髓之痼非但識悟之為難亦乃信受之

弗易倉公有言信巫不信醫死不治也時珍曰素

問云上古作湯液故為而弗服中古道德稍衰邪

氣時至服之萬全當今之世必齊毒藥攻其中鑱

石鍼艾治其外又曰中古治病至而治之湯液十

日不已治以草蘇荜枝本末為助標本已得神氣

乃復暮世之病不本四時不知日月不審逆從病

形已成以為可救故病未已新病復起瀉于意曰

病有六不治驕恣不論于理一不治輕身重財二

不治衣食不適三不治陰陽臟氣不定四不治形
羸不能服藥五不治信巫不信醫六不治六者有
一則難治也宗奭曰病有五失失于不審失于不
信失于過時失于不擇醫失于不識病五失有一
即為難治又有八要一曰虛二曰實三曰冷四曰
熱五曰邪六曰正七曰內八曰外也素問言凡治
病察其形氣色澤觀人勇怯骨肉皮膚能知其情
以為診法若患人脈病不相應既不得見其形醫
止據脈供藥其可得乎今豪富之家婦人居帷幔
之內復以帛幪手臂既無望色之神聽聲之聖又
不能盡切脈之巧未免詳問病家厭繁以為術疎
往往得藥不服是四診之術不得其一矣可謂難
也嗚呼

若用毒藥療病先起如黍粟病去即止不去倍之

不去十之取去為度

宏景曰今藥中單行一兩種
有毒只如巴豆甘遂將軍不

可便令盡劑如經所云一物一毒服一丸如細麻
 二物一毒服二丸如大麻三物一毒服三丸如胡
 豆四物一毒服四丸如小豆五物一毒服五丸如
 大豆六物一毒服六丸如梧子從此至十皆以梧
 子為數其中又有輕重且如狼毒鉤吻豈如附子
 芫花輩耶此類皆須量宜宗奭曰須有此例更合
 論人老少虛實病之漸久藥之多
 毒少毒斟量之不可執為定法

療寒以熱藥療熱以寒藥飲食不消以吐下藥鬼

疰蠱毒以毒藥癰腫瘡瘤以瘡藥風溼以風溼藥

各隨其所宜宏景曰藥性一物兼主十餘病者取其偏長為本復觀人之虛實補瀉男

女老少苦樂榮悴鄉壤風俗並各不同褚澄療寡婦尼僧異乎妻妾此是達其性懷之所致也時珍

曰氣味有厚薄性用有躁靜治體有多少力化有淺深正者正治反者反治用熱遠熱用寒遠寒用

涼遠涼用溫遠溫發表不遠熱攻裏不遠寒不遠
熱則熱病至不遠寒則寒病至治熱以寒溫而行
之治寒以熱涼而行之治溫以清冷而行之治清
以溫熱而行之木鬱達之火鬱發之土鬱奪之金
鬱泄之水鬱折之氣之勝也微者隨之甚者制之
氣之復也和者平之暴者奪之高者抑之下者舉
之有餘折之不足補之堅者削之客者除之勞者
溫之結者散之留者行之燥者濡之急者緩之散
者收之損者益之逸者行之驚者平之吐之汗之
下之補之瀉之久新同法又曰逆者正治從者反
治反治者熱因寒用寒因熱用塞因塞用通因通
用必伏其所主而先其所因其始則同其終則異
可使破積可使潰堅可使氣和可使必已又曰諸
寒之而熱者取之陰熱之而寒者取之陽所謂求
其屬以衰之也此皆
約取素問之粹言

病在胸膈已上者先食後服藥病在心腹已下者

本草綱目卷一
卷一
五
先服藥而後食病在四肢血脈者宜空腹而在日

病在骨髓者宜飽滿而在夜宏景曰今方家先食後食蓋此義也又有

須酒服者飲服者冷服者熱服者服湯則有疎有

數煮湯則有生有熟各有法用並宜詳審杲曰古

人服藥活法病在上者不厭頻而少病在下者不

厭頓而多少服則滋榮于上多服則峻補于下凡

云分再服三服者要令勢力相及并視人之

強弱病之輕重以為進退增減不必泥法

夫大病之主有中風傷寒寒熱溫瘧中惡霍亂大

腹水腫腸澀下痢大小便不通奔豚上氣欬逆嘔

吐黃疸消渴留飲癖食堅積癥瘕癩邪驚癇鬼疰

喉痺齒痛耳聾目盲金瘡踈折癰腫惡瘡痔瘻癭

瘤男子五勞七傷虛乏羸瘦女子帶下崩中血閉

陰蝕蟲蛇蠱毒所傷此大畧宗兆其閒變動枝葉

各宜依端緒以收之

宏景曰藥之所主止說病之一名假令中風乃有數十種

傷寒證候亦有二十餘條更復就中求其類例大

體歸其始終以本性為根宗然後配證以合藥爾

病之變狀不可一槩言之所以醫方千卷猶未盡

其理春秋已前及和緩之書蔑聞而道經畧載扁

鵠數法其用藥猶是本草家意至漢溘于意及華

陀等方今時有存者亦皆條理藥性惟張仲景一

部最為眾方之祖又悉依本草但其善診脈明氣

候以意消息之爾至于剗腸剖臆刮骨續筋之法

乃別術所得非神農家事自晉代以來有張苗宮

泰劉德史脫靳邵趙泉李子豫等一代良醫其貴

勝阮德如張茂先輩逸民皇甫士安及江左葛洪

蔡謨殷仲堪諸名人等並研精藥術宋有羊欣元

神農本草經名例

微胡洽秦承祖齊有尚書褚澄徐文伯嗣伯羣從
 兄弟療病亦十愈八九凡此諸人各有所撰用方
 觀其指趣莫非本草者或時用別藥亦循其性度
 非相踰越范汪方百餘卷及葛洪肘後其中細
 碎單行經用者或田舍試驗之法或殊域異識之
 術如藕皮散血起自庖人牽牛逐水近出野老麩
 店蒜齏乃是下蛇之藥路邊地菘而為金瘡所祕
 此蓋天地間物莫不為天地閒用觸遇則會非其
 主對矣顏光祿亦云道經仙方服食斷穀延年卻
 老乃至飛丹鍊石之奇雲騰羽化之妙莫不以藥
 道為先用藥之理一同本草但制御之途小異世
 法所用不多遠至二十餘物或單行數種歲月深
 積便致大益即本草所云久服之效不如俗人微
 覺便止今庸醫處療皆恥看本草或倚約舊方或
 聞人傳說便攬筆疏之以此表奇其畏惡相反故
 自寡味而藥類違僻分兩參差不以為疑偶爾值
 瘥則自信方驗旬月未瘳則言病源深結了不反
 求諸己虛構聲稱自應貽譴矣其五經四部軍國

禮服少有乖越止於事迹非宜爾至于湯藥一物
有謬便性命及之千乘之君百金之長可不深思
戒慎耶宗奭曰人有貴賤少長病當別論病有新
久虛實理當別藥蓋人心如面各各不同惟其心
不同臟腑亦異欲以一藥通治眾人之病其可得
乎張仲景曰有土地高下不同物性剛柔食居亦
異是故黃帝興四方之問岐伯舉四治之能且如
貴豪之家形樂志苦者也衣食足則形樂而外實
思慮多則志苦而內虛故病生于脈與貧下異當
因人而治後世醫者委此不行所失甚矣又凡人
少長老其氣血有盛壯衰三等故岐伯曰少火之
氣壯壯火之氣衰蓋少火生氣壯火散氣況衰火
乎故治法亦當分三等其少日服餌之藥于壯老
之時皆須別處決不可忽○又云人以氣血爲本
世有童男室女積想在心思慮過當多致勞損男
則神色先散女則月水先閉蓋憂愁思慮則傷心
心傷則血逆竭故神色先散而月水先閉也火既
受病不能營養其子故不嗜食脾既虛則金氣虧

散發嗽嗽既作水氣絕故四肢乾木氣不充故多
怒鬢髮焦筋痿俟五臟傳遍故卒不能死然終死
矣此于諸勞最爲難治或能改易心志用藥扶接
閒得九死一生耳○有人病久嗽肺虛生寒熱以
款冬花芽焚三兩俟煙出以筆管吸其煙滿口則
燕之至倦乃已日作五七次遂瘥○有人病瘧月
餘又以藥吐下之氣遂弱觀其脈病乃夏傷暑秋
又傷風因與柴胡湯一劑安後又飲食不節寒熱
復作吐逆不食脇下急痛此名痰瘧以十棗湯一
服下痰水數升服理中散二錢遂愈○有婦人病
吐逆大小便不通煩亂四肢冷漸無脈凡一日半
與大承氣湯二劑至夜半大便漸通脈漸生翌日
乃安此關格之病極難治經曰關則吐逆格則不
得小便亦有不爲大便者○有人苦風痰頭痛顛
掉吐逆飲食減醫以爲傷冷物温之不愈又以丸
下之遂厥復與金液丹後譫言吐逆顛掉不省人
狂若見鬼循衣摸牀手足冷脈伏此胃中有結熱
故昏瞶不省人以陽氣不能布于外陰氣不持于

內卽顛掉而厥遂與大承氣湯至一劑乃愈○有
婦人病溫已十二日診其脈六七至而澁寸稍大
尺稍小發寒熱頰赤口乾不了了耳聾問之病後
數日經水乃行此屬少陽熱入血室治不對症必
死乃與小柴胡湯二日又加桂枝乾薑湯一日寒
熱止但云我臍下急痛與抵當丸微利痛止身涼
尙不了了復與小柴胡湯次日云我胸中熱燥口
鼻乾又少與調胃承氣湯不利與大陷胸丸半服
利三行次日虛煩不甯妄有所見狂言知有燥屎
以其極虛不敢攻之與竹葉湯去其煩熱其大便
自通中有燥屎數枚狂煩盡解惟欬嗽唾沫此肺
虛也不治恐乘虛作肺痿以小柴胡去人參薑棗
加乾薑五味子湯一日欬減二日悉痊○有人年
六十腳腫生瘡忽食豬肉不安醫以藥下之稍愈
時出外中風汗出頭面暴腫起紫黑色多睡耳輪
上有浮泡小瘡黃汁出乃與小續命湯倍加羌活
服之遂愈○有人年五十四素羸多中寒少年常
服土硫黃數斤近服菟絲有效脈左上二部右下

三部弦緊有力五七年來病右手足筋急拘攣言
語稍遲遂與仲景小續命湯加薏苡仁一兩以治
筋急減黃芩人參芍藥各半以避中寒杏仁只用
一百五枚後云尙覺大冷因盡去人參芍藥加當
歸一兩半遂安小續命湯今人多用不能
能逐證加減遂至危殆故舉以爲例

陶隱居名醫別錄合藥分劑法則

古秤惟有銖兩而無分名今則以十黍爲一銖六
銖爲一分四分成一兩十六兩爲一斤雖有子穀

秬黍之制從來均之已久依此用之
蘇恭曰古秤皆複今南秤

是也後漢以來分一斤爲二斤一兩爲二兩古方
惟張仲景而已涉今秤若用古秤則水爲殊少矣

杲曰六銖爲一分卽二錢半也二十四銖爲一兩
古云三兩卽今之一兩云二兩卽今之六錢半也

時珍曰蠶初吐絲曰忽十忽曰絲十絲曰釐四釐曰綮音壘十釐曰分四綮曰字二分半也十綮曰銖四分也四字曰錢十分也六銖曰一分去聲二錢半也四分曰兩二十四銖也八兩曰鎰二鎰曰斤二十四兩曰鎰一斤半也準官秤十二兩三十斤曰鈞四鈞曰石一百二十斤也方中有曰少許者些子也今古異制古之一兩今用一錢可也

今方家云等分者非分兩之分謂諸藥斤兩多少皆同爾多是丸散用之

丸散云刀圭者十分方寸匕之一準如梧桐子大也方寸匕者作匕正方一寸抄散取不落爲度五匕者卽今五銖錢邊五字者抄之不落爲度一撮

者四刀圭也 匕卽匙也

藥以升合分者謂藥有虛實輕重不得用斤兩則

以升平之十撮爲一勺十勺爲一合十合爲一升

升方作上徑一寸下徑六分深八分內散藥物按

抑之正爾微動令平爾 時珍曰古之一升卽今之二合半也量之所起爲圭

四圭爲撮十撮爲勺十勺爲合十合爲升十升爲斗五斗曰斛二斛曰石

凡湯酒膏藥云吹咀者謂秤畢擣之如大豆又吹

去細末藥有易碎難碎多末少末今皆細切如吹

咀也 恭曰吹咀商量斟酌之也宗爽曰吹咀有含味之意如人以口齒咀齧雖破而不塵古方

多言咬咀此義也杲曰咬咀古制也古無鐵刃以口咬細令如麻豆煎之今人以刀剉細爾

凡丸藥云如細麻者卽胡麻也不必扁扁略相稱

爾黍粟亦然云如大麻子者準三細麻也如胡豆

者卽今青斑豆也以二大麻準之如小豆者今赤

小豆也以三大麻準之如大豆者以二小豆準之

如梧子者以二大豆準之如彈丸及雞子黃者以

四十梧子準之

宗奭曰今人用古方多不效者何也不知古人之意爾如仲景治胸

痹心中痞堅逆氣搶心用治中湯人參朮乾薑甘草四物共一十二兩水八升煮取三升每服一升日三服以知爲度或作丸須雞子黃大皆奇效今人以一丸如楊梅許服之病既不去乃曰藥不神

本草綱目卷一
非藥之罪用
藥者之罪也

凡方云巴豆若干枚者粒有大小當去心皮秤之
以一分準十六枚附子烏頭若干枚者去皮畢以
半兩準一枚枳實若干枚者去瓢畢以一分準二
枚橘皮一分準三枚棗大小三枚準一兩乾薑一
兩者以一兩爲正

凡方云半夏一升者洗畢秤五兩爲正蜀椒一升
三兩爲正吳茱萸一升五兩爲正菟絲子一升九
兩爲正菴藟子一升四兩爲正蛇牀子一升三兩

半爲正地蘆子一升四兩爲正其子各有虛實輕重不可秤準者取平升爲正

凡方云用桂一尺者削去皮重半兩爲正甘草一尺者二兩爲正云某草一束者三兩爲正云一把者二兩爲正

凡方云蜜一斤者有七合豬膏一斤者有一升二合也

凡丸散藥亦先切細暴燥乃擣之有各擣者有合擣者並隨方其潤溼藥如天蘆冬地黃輩皆先增

分兩切暴獨擣碎更暴若逢陰雨微火烘之既燥

停冷擣之

時珍曰凡諸草木藥及滋補藥並忌鐵器金性尅木之生發之氣肝腎受傷也

惟宜銅刀竹刀脩治乃佳亦有忌銅器者並宜如法丸散須用青石碾石磨石曰其砂石者不良

凡篩丸散用重密絹各篩畢更合于白中擣數百

遍色理和同乃佳也巴豆杏仁胡麻諸膏膩藥皆

先熬黃擣令如膏指攪

莫結切

視泯泯乃稍稍入散

中合研擣散以輕疎絹篩度之再合擣勻

凡煮湯欲微火令小沸其水依方大略二十兩藥

用水一斗煮取四升以此為準然利湯欲生少水

而多取汁補湯欲熟多水而少取汁不得令水多
少用新布兩人以尺木絞之澄去泥濁紙覆令密
溫湯勿用鐵器服湯甯小沸熱則易下冷則嘔涌
之才曰湯中用酒須臨熟乃下之時珍曰陶氏所
說乃古法也今之小小湯劑每一兩用水二甌爲
準多則加少則減之如劑多水少則藥味不出劑
少水多又煎耗藥力也凡煎藥並忌銅鐵器宜用
銀器瓦罐洗淨封固令小心者看守須識火候不
可太過不及火用木炭蘆葦爲佳其水須新汲味
甘者流水井水沸湯等各依方詳見水部若發汗
藥必用緊火熱服攻下藥亦用緊火煎熟下消黃
再煎溫服補中藥宜慢火溫服陰寒急病亦宜緊
火急煎服之又有陰寒煩躁及暑月伏陰在內者
宜水中
沈冷服

凡漬藥酒皆須細切生絹袋盛入酒密封隨寒暑

日數漉出滓可暴燥微擣更漬亦可為散服時珍曰別

有釀酒者或以藥煮汁和飯或以藥袋安置酒中或煮物和飯同釀皆隨方法又有煮酒者以生絹

袋藥入壘密封置大鍋中水煮一日埋土中七日出火毒乃飲凡建中腎瀝諸補

湯滓合兩劑加水煮竭飲之亦敵一劑皆先暴燥

陳藏器曰凡湯中用麝香牛黃犀角羚羊角蒲黃丹砂芒消阿膠輩須細末如粉臨時納湯中攪和

服之

凡合膏初以苦酒漬令淹浹不用多汁密覆勿洩

云晬時者周時也從今旦至明旦亦有止一宿者

煮膏當三上三下以洩其熱勢令藥味得出上之
使匝匝沸乃下之使沸靜良久乃止中有薤白者
以兩頭微焦黃爲候有白芷附子者以小黃色爲
度以新布絞去滓滓亦可酒煮飲之摩膏滓可傅
病上膏中有雄黃朱砂麝香輩皆別擣如麪絞膏
畢乃投中疾攪勿使沈聚在下有水銀胡粉者於

凝膏中研令消散

時珍曰凡熬貼癰疽風溼諸病膏者先以藥浸油中三日乃煎

之前至藥枯以絹濾淨煎熱下黃丹或胡粉或密陀僧三上三下煎至滴水成珠不散傾入器中以水浸三日去火毒用若用松脂者煎至成絲傾入水中拔扯數百遍乃止俱宜謹守火候勿令太過

不及也其有朱砂雄黃龍腦麝香血竭乳香沒藥等料者並待膏成時投之黃丹胡粉密陀僧並須水飛瓦炒過松脂須煉數遍乃良

凡丸中用蠟皆烱投少蜜中攪調以和藥

杲曰丸藥用蠟

取其固護藥之氣味勢力以過關隔而作效也若投以蜜下咽亦易散化如何得到臟中若有毒藥反又害之非用蠟之本意也

凡用蜜皆先大煎掠去其沫令色微黃則丸藥經

久不壞

雷斅曰凡鍊蜜每一斤止得十二兩半是數火少火過並不得用也脩合丸藥用蜜

只用蜜用錫只用錫用糖只用糖勿交雜用必瀉人也

采藥分六氣歲物

岐伯曰厥陰司天爲風化在泉爲酸化清毒不生
少陰司天爲熱化在泉爲苦化寒毒不生太陰司
天爲溼化在泉爲甘化燥毒不生少陽司天爲火
化在泉爲苦化寒毒不生陽明司天爲燥化在泉
爲辛化溼毒不生太陽司天爲寒化在泉爲鹹化
熱毒不生治病者必明六化分治五味五色所生五臟
所宜乃可言盈虛病生之緒本乎天者天之氣本
乎地者地之氣謹候氣宜無失病機司歲備物則
無遺主矣歲物者天地之專精也非司歲物則氣

散質同而異等也氣味有厚薄性用有躁靜治保
有多少力化有淺深上淫于下所勝平之外淫于
內所勝治之王冰曰化于天者為天氣化于地者
為地氣五毒皆五行之氣所為故所
勝者不生惟司天在泉之所生者其味正故藥工
專司歲氣所收藥物則所主無遺畧矣五運有餘
則專精之氣藥物肥濃使用當其正氣味也不足
用藥不專精而氣散物不純形質雖同力用則異
矣故天氣淫于下地氣淫于內者皆以所
勝平治之如風勝溼酸勝甘之類是也

七方

岐伯曰氣有多少病有盛衰治有緩急方有大小
又曰病有遠近證有中外治有輕重近者奇之遠

者偶之汗不以奇下不以偶補上治上制以緩補

下治下制以急近而奇偶制小其服遠而奇偶制

大其服大則數少小則數多多則九之少則二之

奇之不去則偶之偶之不去則反佐以取之所謂

寒熱溫涼反從其病也

王冰曰臟位有高下腑氣有遠近病證有表裏藥用

有輕重單方為奇複方為偶心脾為近肝腎為遠

脾胃居中腸腑胞膽亦有遠近識見高遠權以合

宜方奇而分兩偶方偶而分兩奇近而偶制多數

服之遠而奇制少數服之則肺服九心服七脾服

五肝服三腎服一為常制也方與其重也甯輕與

其毒也甯善與其大也甯小是以奇方不去偶方

主之偶方不去則反佐以同病之氣而取之夫微

小之熱折之以寒微小之冷消之以熱甚大寒熱

則必能與異氣相格聲不同不相應氣不同不相
合是以反其佐以同其氣復令寒熱參合使其始
同終異也時珍曰逆者正治從者反治反佐即從
治也謂熱在下而上有寒邪拒格則寒藥中入熱
藥為佐下膈之後熱氣既散寒性隨發也寒在下
而上有浮火拒格則熱藥中入寒藥為佐下膈之
後寒氣既消熱性隨發也此寒因熱用熱因寒用
之妙也溫涼倣此完素曰流變在乎病主病在乎
方制方在乎人方有七大小緩急奇偶複也制方
之體本于氣味寒熱溫涼四氣生于天酸苦辛鹹
甘淡六味成于地是以有形為味無形為氣氣為
陽味為陰辛甘發散為陽酸苦涌泄為陰鹹味涌
泄為陰淡味滲泄為陽或收或散或緩或急或燥
或潤或軟或堅各隨臟腑之證而施藥之品味乃
分七方之制也故奇偶複者三方也大小緩
急者四制之法也故曰治有緩急方有大小
大方岐伯曰君一臣二佐九制之大也君一臣三
佐五制之中也君一臣二佐九制之小也又曰遠

而奇偶制大其服近而奇偶制小其服大則數少
小則數多多則九之少則二之完素曰身表為遠
裏為近大小者制奇偶之法也假如小承氣湯調
胃承氣湯奇之小方也大承氣湯抵當湯奇之大
方也所謂因其攻裏而用之也桂枝麻黃偶之小
方也葛根青龍偶之大方也所謂因其發表而用
之也故曰汗不以奇下不以偶張從正曰大方有
二有君一臣三佐九之大方病有兼證而邪不一
不可以一二味治者宜之有分兩大而頓服之大
方肝腎及下部之病道遠者宜之王太僕以心肺
為近腎肝為遠脾胃為中劉河間以身表為遠身
裏為近以予觀之身半以上其氣主天之分也身
半以下其氣主地之分也中脘人之分也

小方

從正曰小方有二有君一臣二之小方病無
兼證邪氣專一可一二味治者宜之有分兩

少而頻服之小方心肺及在上之病者宜之徐徐
細呷是也完素曰肝腎位遠數多則其氣緩不能

速達于下必大劑而數少取其迅急下走也心肺
 位近數多則其氣急下走不能升發于上必小劑
 而數多取其易散而上行也王氏所謂肺服九心
 服七脾服五肝服三腎服一乃五臟生成之數也
緩方岐伯曰補上治上制以緩補下治下制以急
 道氣味之者食而過之無越其制度也王冰曰假
 如病在腎而心氣不足服藥宜急過之以氣味
 飼心腎藥凌心心復益衰矣餘上下遠近例同完
 素曰聖人治上不犯下治下不犯上治中上下俱
 無犯故曰誅伐無過命曰大惑好古曰治上必妨
 下治表必違裏用黃芩以治肺必妨脾用菹蓉以
 治腎必妨心服乾薑以治中必僭上服附子以補
 火必涸水從正曰緩方有五有甘以緩之之方甘
 草蜜糖之屬是也病在胸膈取其留戀也有丸以
 緩之之方比之湯散其行遲慢也有品件眾多之
 緩方藥眾則遞相拘制不得各騁其性也有無毒
 治病之緩方無毒則性純功緩也有氣味俱薄之

緩方氣味薄則長于補上治
上比至其下藥力已衰矣

急方

完素曰味厚者為陰味薄者為陽故
味厚則下泄味薄則通氣氣厚者為陰中之陽故

為陽中之陰故氣厚則發熱氣薄則發汗是也
古曰治主宜緩緩則治其本也治客宜急急則治
其標也表裏汗下皆有所當緩所當急從正曰急
方有四有急病急攻之急方中風關格之病是也
有湯散蕩滌之急方下咽易散而行速也有毒藥
之急方毒性能上涌下泄以奪病勢也有氣味俱
厚之急方氣味俱厚直趨于下而力不衰也

奇方

王冰曰單方也從正曰奇方有二有獨用一
物之奇方病在上而近者宜之有藥合陽數

一三五七九之奇方宜下不宜汗完素曰假如小
承氣奇之小方也大承氣抵當湯奇之大方也所
謂因其攻下而為之也桂枝麻黃偶之小方也葛
根青龍偶之大方也所謂因其發散而用之也

本草綱目卷之七方

偶方

從正曰偶方有三有兩味相配之偶方有古

而遠者宜之有藥合陰數二四六八十之偶方宜

汗不宜下王太僕言汗藥不以偶則氣不足以外

發下藥不以奇則藥毒攻而致過意者下本易行

故單行則力孤而微汗或難出故併行則力齊而

大乎而仲景制方桂枝汗藥反以五味為奇大承

氣下藥反以四味為偶何也豈臨事制宜復有增

乎損

複方

岐伯曰奇之不去複以偶偶之不去是謂重方好古曰

複者再也重也所謂十補一泄數泄一補也又傷

寒見風脈傷風得寒脈為脈證不相應宜以複方

主之從正曰複方有三有二方三方及數方相合

之複方如桂枝二越婢一湯五積散之屬是也有

本方之外別加餘藥如調胃承氣加連翹薄荷黃

芩芎子為涼膈散之屬是也有分兩均齊之複方

如胃風湯各等分之屬是也王太僕以偶爲複方
今七方有偶又有複豈非偶乃二方相合複乃數
方相合
之謂乎

本草綱目序例第一卷上終